

# MPE NGE ZABA YAWU VE



Matondo na nge, Mpangi Neville. Mfumu kusakumuna nge. Ba me kuzwa munu, mutindu yina ve? Mu zola kutonda Mfumu, mingi, na yina Yandi me keba mwana ya bakala ya Mpangi Capps. Ya me salama ti yayi kele mwa ntangu yina mu ke vutukaka na Indiana. Mu zaba ti bawu ke na kubakaka yawu na bande ve; mu banza ti bawu ke na kusalaka yawu ve. Mpe yina samu ti mu ke mona muntu mosi ve na kati kuna, na yina bawu . . . Mu me vutuka samu na kuzomba bampadi. Mpe na yina mu banza ti Charlie ke vingila munu, yandi na Nellie, mpe bayankaka kuna na Kentucky, ntangu yayi samu na kilumbu mosi to zole, samu na kuzomba bampadi. Na yina, mu ke zola kukondwa kima nionso, kisalu yankaka ya kulenga, samu na kukwisa awa na . . . pene-pene ya kati-kati ya Ngonda ya nana, mpe kukwenda kuzomba bampadi na Charlie mpe Banks, mpe bawu nionso. Ya me kuma mutindu kinkulu samu na munu. Mpe na yina mu bakaka Joe . . .

<sup>2</sup> Ntangu beto vwandaka awa kilumbu yankaka yina, beto nionso kuzwaka kimbevo, samu na nsobolo ya klima ya mwini ya ngolo kuna na—na klima yayi ya madidi yina beno kele na yawu awa. Mu zaba ti beno ke banza ti yayi kele madidi ve, kasi beno kwisa mbala mosi kuna na Arizona. Ya vwandaka na kiteso makumi yiya na tatu na kivudi ntangu mu basikaka na suka yina; mpe na yina pene ya midi ya mpimpa, na mpimpa, ntangu mupepe ya kitoko vwandaka kulumuka na miongo, yawu vwandaka kaka na kiteso makumi tatu na sambanu. Uh-huh. Beno me mona, yina kele na kati-kati ya mpimpa, na ntangu mupepe ya madidi vwandaka kulumuka. Mpe na yina ya kele . . . Kisika yina kele mbote mingi na nsungi ya hiver, kasi ya kele samu na bankala-nseke mpe miseleketete na été, samu na bantu ve. Ata mpe baniamana nionso ke katuka na miongo. Bawu lenda ve kukangila yawu ntima.

<sup>3</sup> Mpe mu kwendaka bula masasi kuna mpe mu vwandaka yidika munduki ya munu. Mu . . . Na mutindu nionso mu zola kaka kuzonzila beno na mwana ya bakala ya mpangi Capps. Mpe mu tubaka . . . Mpe, Joe, mu ke pesa yandi kaka munduki, samu ti yandi lenda kubula munduki kulutila munu. Beto yidikaka yawu, mpe mu vwandaka—mu vwandaka kotisa ba-punaise na ba-kilomètre makumi tanu. Mpe mu tubaka na—na Joe . . . Joe tubaka, “Papa, mu ke kwikila ti mu lenda sala yawu.” Mwana-bakala ya mputu vwandaka na mpasi na yintu. Mu vwandaka sambila samu na yandi, yandi vwandaka na fièvre ya ngolo. Yandi kwisaka kuna na kisika mu telemaka, mpe mu . . .

<sup>4</sup> Na diametre ya zole na zulu ya kumi na carabine .22, ba ke kutana na nzila ya yandi ya masasi na ba-mètre makumi zole

na tanu; ya kele diaka mbote na makumi tanu, kaka mutindu mosi, kana ya kele zole na zulu ya kumi na tanu. Na yina. . . Mpe mu yidikaka yawu na ba-metre makumi zole na tanu. Mpe na yina mu vwandaka diaka na ba-punaise zole mpe mu tulaka yawu, mpe Joe kotisaka yawu nionso zole! Mu vwandaka diaka ve na ba-punaise, na yina mu tulaka mwa kitini ya fioti ya pigeon ya argile, yina bantu yina ke sadilaka ball-trap bulaka kuna, mpe yina vwandaka pene ya ba-millimetre sambanu na nene, mpe mu tulaka yawu na bametele makumi tanu, mpe yandi zengaka yawu na bitini zole. Mpe viseur vwandaka ya kuludika na mutindu ya kumona ya munu, kaka mwa bamvula kulutula yandi. Na yina yandi tubaka, “Nge zaba yinki? Mu fwana kuluta kuna mpe kutuba na Billy na kubika munu swi kubanda ntangu yayi.” Beno me mona?

<sup>5</sup> Na yina, na yina mu tubaka, “Mbote, mu ke tuba na nge yinki,” yandi tubaka, “beto kwenda kuna mpe beto talisa yina na Mpangi Norman.”

<sup>6</sup> Mu tubaka, “Joe, na ba-compétition na yinza ya muvimba, mu ke kipe ve nani ya ke vwanda, ata muntu mosi ve. . .” Ntangu yayi, ba kotisaka ve ba-punaise na lweka, ya vwandaka ya kukotisa na ndonga. Mpe kitini yina, yina vwandaka kulutula ve, ba-millimètre sambanu, mu banza, ba-millimètre zole na nene, mpe ba-millimètre sambanu na yinda, yandi zengaka yawu ndambu na ba-metre zole, na ba-mètre makumi tanu. Mu tubaka, “Ya ke na muntu mosi ve na yinza yina lendaka bula munduki kulutula mbote. Ba-champion, zolaka sala mutindu mosi, kasi nge zolaka bula ve masasi tatu ya kitoko mingi kulutula yayi.” Ba-punaise, tengamaka ve, na kukotaka na papier ya salaka dibulu mosi ya ronde. Mpe mu tubaka, “Muntu mosi ve lenda kubula munduki kulutula mbote.” Mbote mingi. Mu banza ti mpasi ya yintu ya yandi kwendaka na mbala mosi.

<sup>7</sup> Mpe mu tubaka, “Mbote, beto kwenda talisa yayi na Mpangi Norman,” yina ke salaka kisalu na magazini ya ba-article ya ngalalise *Field And Stream*, ya Mpangi Tony Stromei.

<sup>8</sup> Yandi tubaka, “Beto luta ntete na Billy.” Yandi tubaka, “Mu—mu zola tuba na Bubby kima mosi.” Beno me mona? Mpe, ya kieleka, mpangi ya yandi me salaka yawu mbote ata fioti ve. Na yina yandi tubaka, “Beto ke luta kuna ntete.”

<sup>9</sup> Mpe kaka na ntangu mu kotaka na kielo, Billy vwandaka kaka na pyjama ya yandi. Mpe yandi tubaka. . . Beto kwendaka na ngunga ya mbote, samu na manima mwini ke vwandaka ngolo. Mpe na yina yandi tubaka. . . Allo-allo bandaka na kuyimba. Mpe mu tubaka. . . Yandi talaka munu mutindu yayi. Mu tubaka, “Mu banza ya kele lubokilu ya mbevo.” Mpe ya vwandaka Mpangi Capps samu na mwana ya yandi ya bakala, na kati ya kivinga ya lipaso, na péritonite mpe nionso yina ke landa.

Mpe ntangu yayi yandi me tuba na munu ti mwana ya yandi ya bakala ke na kukuma kieleka, kieleka mbote.

<sup>10</sup> Na yina, beno me mona wapi mutindu Nzambi salaka yawu, ata mpe na ndinga ya mwana-bakala yina, Joe? Na kisika ya kukwenda na yinzo ya Mpangi Norman, beto zolaka vwanda kuna ve, mpe beto kwendaka na zulu. Mpe Mpangi Capps mpe munu me vukana kintwadi. Mu ke tuba ve ti ya vwandaka bisambu ya beto yina me sala yawu, kasi ya me tuba kima mosi samu na yandi samu na beto na kuvwanda na ngwisani mutindu yina. Mpe, ya kieleka, yawu yina . . . Ntangu beno—beno fwana vwanda na lukwikilu na yina beno ke na kusala. Beno me mona? Mpe, ti, lukwikilu ya yandi na kubokila, mpe Billy vwandaka . . .

<sup>11</sup> Ba vwandaka tula mbongo. Yandi tubaka, “Yayi fwana vwanda lubokilu ya ntama mingi,” yandi tubaka, “yandi vwandaka pene-pene ya ba-dollars tanu samu na kusoba, na tatu . . . na lubokilu ya bamuniti tatu.” Mpe mu banzaka ti ya ke katuka na New York to kuna na mosi ya bisanga to kima mosi. Kasi yandi salaka lubokilu ya muntu na muntu, samu na kutuba na Billy na kisika ya Loyce, beno me mona, mpe yawu yina ya lombaka yandi mingi na kusala.

<sup>12</sup> Mpe ntangu yayi mwana ya yandi ya bakala ke na kubeluka. Mpangi Capps me tuba ti dokotolo pesaka yandi mwa kivuvu ya fyoti ya kubasika na yawu, beno me mona, na lipaso. Mpe beto ke vutula matondo na Nzambi na suka yayi samu na yayi, beto ke na kiese mingi samu na yawu.

<sup>13</sup> Ntangu yayi, beto kumaka na suka-suka, na suka yayi, mpe mu me lala na kutala bangunga tatu, mpe—mpe mu kele kieleka ya kulemba. Kasi ntangu dibuundu . . . ntangu ya kumaka ntangu ya kukwisa na yinzo-Nzambi, na yina, mu me kwisa.

<sup>14</sup> Mpe kana Mfumu kuzola, ntangu yayi mu ke kwenda kuna na Kentucky, mutindu mu tubaka. Na yina mu silaka na kulonga na Lumingu mosi na yina mu ke vutuka awa, mpe mu ke sala mbote na kusala yawu na Lumingu ke kwisa, samu mu ke vwanda . . . mu fwana kuvutuka. Samu mu ke kwenda ntama diaka, kuna na Canada. Na yina mu—mu ke sala mbote na kusala yawu Lumingu ke kwisa, mpe na Lumingu ke kwisa na suka.

<sup>15</sup> Mpe Mpangi Neville me tuba, “Samu na yinki nge ke basika ve mpe kupesa mbote na bantu, mpe nge kutuba na bawu kaka na mwa ntangu fioti?”

<sup>16</sup> Mu tubaka, “Mpangi Neville, mu me zibula ve Biblia ya munu, na kutala.” Mu tubaka, “Mu . . .”

<sup>17</sup> Yandi tubaka, “Mbote, kwiza mpe tuba kima mosi na bawu.” Mpe, Mpangi-kento Neville, mu—mu—mu zaba ve wapi mutindu nge ke salaka. Yandi kele bakala yina zaba kundimisa muntu. Kasi na yina . . .

<sup>18</sup> Mu ke vwandaka ve na siansi ya kutuba yayi ntangu ya kele na bantu mingi me fuluka, mpe nkonga ya bantu mingi, mpe nionso yina, kasi mu ke vutula matondo mingi na Nzambi samu na pasteur mutindu Mpangi Orman Neville. Ya kukwikama, kaka ya kukwikama mutindu yandi lendaka vwanda, na Diambu, mpe beno ke kuwa yandi ke niunguta ata fioti ve. Mu vwandaka ya kuvwanda na manima kuna . . . Mu vwandaka me kuzwa ndambu ya ngunga ya mbote ya kusolola na yandi na yina mu vwandaka sepela na kuwa Mpangi Mann, mpe na yina mu ke tuba na yandi mingi na zulu ya yawu ntangu beto ke kwenda kuna na Colorado na mvula yayi. Na yina ntangu beto vwandaka sepela na nsangu ya yandi, mpe mu kuzwaka masolo ya mbote na Mpangi Neville. Mu tubaka, “Mu ke kuzwaka ve ntangu ya kutuba na bantu kima na zulu ya pasteur ya beto ya mbote.” Mu tubaka, “Bantu ke salaka nge mbote?”

Yandi tubaka, “Ya lendaka vwanda ve na yina ke lutila.”

Mpe mu tubaka, “Mbote, mu ke na kiese na kuwa yawu.”

<sup>19</sup> Ntangu pasteur me sepela, mpe bantu me sepela, ya ke salaka dibuundu ya mbote ya kieleka, mpe na yina Nzambi ke sepela. Mpe mu banza, kumona ti bawu me sepela mingi, mingi-mingi na kilumbu yayi ya Nsangu yina beto ke longa, mu banza ti ya ke lakisa kulandila ya Nsangu na bantu mpe na Nzambi. Beno me mona?

<sup>20</sup> Mpe mu ke vutula matondo mingi na Mpangi Orman Neville, mpe kento ya yandi ya mbote mpe dibuta ya yandi. Mpe mu ke sambila ti Nzambi kukeba bawu na kukwikama na Yandi mpe na Diambu. Mpe kana yawu ke sepelisa Yandi, bika ti beto vwanda ya kutelama awa na kati ya tabernacle ntangu Mfumu Yesu ke kwisa samu na beto, beno me mona, samu na kunata beto na Enlevement. Beto ke na kivuvu ti beto zole kele ya kununa mingi, Mpangi Neville, ti mosi ke tula diboko pene-pene na yankaka, mpe ya kuyekama kuna na zulu ya bankawa ya beto, ke meka kaka na kusimba mbote. Beno me mona? “Na yina beto ke soba, na mwa ntangu fioti, na mbwetolo ya disu.”

Mpe ba-robe yayi ya ntama ya nsuni ke kubwa,  
mpe beto ke mata

Mpe beto ke mata samu na kusimba ntalu ya  
kukondwa nsuka,

Mpe beto ke boka, na yina beto ke luta na  
mipepe,

“Mbote ya nsuka, mbote ya nsuka, ngunga ya  
mbote ya bisambu!”

Na yina beto kwenda na ntwala.

<sup>21</sup> Mu kuwaka na yina me tala kubeluka na Mfumu ya Mpangi Coomers, mpe mu me vutula matondo mingi samu na yawu. Bima mingi. Na yina mu ke vutula matondo na kuvwanda awa na suka yayi. Mpe mu banzaka, na kisika ya . . .

22 Mu ke kwisaka ntangu nionso awa na dilongi mosi, mpe na zulu ya yawu mu ke tuba. Mu banzaka ti mu lendaka kaka—kaka kulandila na suka yayi. Mpe mu tubaka, “Mpangi Neville, mu ke tala kaka monte swi, mpe mu ke bika bantu kubasika na ntangu ya mbote, mpe mu ke tuba na beno kaka na ntima ya munu, na mwa minuti fioti; kaka bima yina, bima yina beto kele kaka . . . Ve, ba ke na kutula yawu ve na bande to kima mosi ve, na yina beto ke bundana kaka na yina dibuundu kele awa, beno me mona, beto nionso kintwadi.”

Na yina beto sambila.

23 Yesu ya luzolo, beto ke vutula matondo na Nge samu na ntangu ya mbote yina beto ke na yawu ya kuvukana awa. Mpe, oh, mutindu mu talaka tabernacle yayi na suka-suka na suka yayi, na manima ya kati-kati ya mpimpa, mu lutaka na ntuala, mu banzaka mutindu Nge simbisaka yawu.

24 Mpe mu ke banza na kiziba ya ntama yina vwandaka awa, mpe na madiadia ya ntama yina vwandaka basika kuna, kaka pene ya kisika chaire yayi kele. Na yina mu vwandaka mwana-bakala ya fioti, mu—mu vwandaka ya kutelama awa. Tata Ingram tubaka ti beto lenda kuzwa kitini ya ntoto samu na mbongo fioti, mpe beto zolaka kupesa ntete mwa mbongo fioti; mpe beto vwandaka na mbongo ve, kima mosi ve samu na kusimbisa, to kima mosi ve ya kupesa, kasi beto vwandaka ya kukubama samu na kumeka. Wapi mutindu ti yawu, na ntangu yina, vwandaka na ntalu kulutila ba-dollar mafunda zole; samu na kufuta yawu na bamvula makumi zole.

25 Mpe ntangu yayi, Mfumu, tala yawu ntangu yayi! Mpe ntangu ya vwandaka na mbandukulu ya yawu, ya vwandaka kaka na kati ya dibulu awa, maza vwandaka kota bisika nionso; wapi mutindu Nge silaka beto, na nzila ya Ndinga: “Munu Mfumu me kuna yawu, Mu ke losila yawu masa na mwini mpe na mpimpa, samu muntu ve kubotula yawu na maboko ya Munu.”

26 Ntangu yina mosi, bantu tubaka, “Na bangonda sambanu, ya ke kituka garage.”

27 Kasi kieleka mafunda ya mioyo me kuzwa Klisto awa na autel. Mpe tabernacle, baptistere me vwanda ntangu nionso . . . Bantu me baka mbotika na Nkumbu ya Mfumu Yesu; ke bokila Nkumbu ya Yandi, ke sukula masumu ya bawu. bankama ya bikata, bantu ya mpasi, bampofo, bankonzo, ba-paralytique, bantu ya kimbevo ya cancer, lutaka na estrade yayi; bawu kwisaka, ya kufwa, babakala mpe bakento, bana-babakala mpe bana-bakento, mpe me kwenda kuzinga luzingu ya malu-malu, na nsuni ya malu-malu na banzutu ya bawu, mpe ba me tambula diaka; ba me bika bakiti ya bawu ya bambevo, ba-béquille, mpe nionso yina. O Nzambi, na bamvula makumi tatu yayi ya kisalu!

28 Tata, mu ke bambuka moyo na suka yina beto tulaka ditadi ya nsongi. Mpe Nge pesaka vision kuna, samu na kutalisa kisika

yango, ya kufuluka na bantu, kisika ya kitoko mingi; Mu—mu zabaka ti ya lendaka kubwa ve. Na yina mu ke tonda Nge samu na bima nionso yayi.

<sup>29</sup> Mingi kati ya bawu me nwana bitumba ya mbote, mpe me manisa kisalu, mpe me kangama na Lukwikilu; ba me vwanda kuna, ke vingila, ke pema na ntangu yayi na bisalu ya bawu, mpe bisalu ya bawu ke landa bawu; ba ke vingila ngunga yina mpungi ke bula, mpe ba ke vumbuka diaka samu na luzingu ya malu-malu, na nzutu ya malu-malu. Mingi ya bawu vwandaka biboba mpe ke tekita, bayankaka bantwenia, ya kati-kati ya bamvula, mpe nionso yina. Kasi Nkumbu ya Nge kubaka lukumu samu na bawu nionso.

<sup>30</sup> Ntangu yayi beto me telama awa dyaka, na ntwala ya luzingu mpe lufwa. Mu ke sambila ti Nge ke pakula Bandinga ya Nge na suka yayi. Mu zaba kima mosi ve samu na kutuba, kasi mu ke sambila ti Nge ke pesa yawu, Nge ke salaka yawu ntangu nionso, Mfumu.

<sup>31</sup> Sakumuna pasteur ya beto, Mpangi Neville, kento ya yandi. Sakumuna ba-administrateur, ba-diacre, konso mambele ya nzutu. Ti, kintwadi, beto zinga na mutindu ti na luzingu yayi, ti na luzingu ke kwisa beto ke kuzwa Luzingu ya Kukonda nsuka.

<sup>32</sup> Sadisa beto na suka yayi na kundima nsembolo ya Kimpeve mpe Ndinga, ti beto lendaka kubama beto mosi mutindu beto ke basika awa na suka yayi, na lukanu ya kieleka na kati ya ntima ya beto samu na kuzinga luzingu ya kulutila mbote na yina beto vwandaka na yawu na ntangu me luta. Beto ke lomba yawu na Nkumbu ya Yesu. Amen.

<sup>33</sup> Ntangu yayi, mu—mu me zibula Biblia awa, mpe ya vwandaka baminuti fyoti me luta. Mu kele na Apocalypse ya 3, na yina mu ke tanga kaka awa, na Nsangu ya Dibuundu ya Laodicée.

<sup>34</sup> Mpe mu zola kuzonzila, mpe, Mpangi Neville vwandaka tuba kaka na munu; Mpangi Parnell, yina mu ke mona kisika mosi awa, ke na kusalaka balukutakanu ya—ya reveil, kaka na lweka yayi ya Memphis. Mpe . . . kana ya kele na bayina na kati ya beno yina me zaba kisika vwandaka Wimpy ya ntama, kiosque ya ba-hamburger, yandi kele na tenta kuna na kati, yandi ke meka na kukotisa bambuma mpe kumona kana ya kele na bantu yina me zimbana yina ba soolaka samu na luzingu, ti yandi lenda nunga na nzila ya ministere ya yandi na Klisto. Mpe yandi kangaka yawu samu na Lumingu, samu na balukutakanu yina kele na tabernacle, mpe—mpe ya kele mbote mingi samu na mpangi-bakala. Mpe beto zola ti beno zaba ti balukutakanu ke banda na Kilumbu ya ntete ya nsuka na nkokila, sabala ke kwisa. Mpe mu zaba ti ba me bokila beno kuna na kuwa Mpangi Parnell ke longa nsangu ya yandi ya zola ya Klisto.

35 Mpe ntangu yayi beto tanga na Apocalypse kapu ya 3, kaka kitini mosi, samu na kutuba ti beto me tanga Biblia. Samu ti, yina mu ke tuba lendaka kubwa, kasi yina Yandi ke tuba ke kondwaka ve. Mpe mu zaba ve kisika ya kubanda, yinki kusala, wapi kisika kukwenda, kasi mu ke tanga kaka Nsungi ya Dibuundu ya Laodicée.

*. . .sonika na wanzio ya dibuundu ya . . .Laodicée;  
Bima yayi me tuba Amen, mbangi ya kukwikama mpe  
ya kieleka, mpe mbandukulu ya luvangulu ya Nzambi;*

*Mu zaba bisalu ya nge, . . .nge ke madidi ve to tiya ve:  
mu ke zola . . .ti nge vwanda madidi to tiya.*

*Na yina samu nge kele tiya ve madidi ve, mpe madidi  
ve to tiya ve, mu ke luka nge na yinwa ya munu.*

*Samu ti nge ke tuba ti, mu kele mvwama, mu me fuluka  
na bima, mu ke na nsatu ya kima mosi ve; mpe nge zaba  
ve ti nge kele muntu ya kiadi, . . .muntu ya mawa, . . .  
muntu ya mputu, . . .mpofo, . . .kinkonga:*

*Mu ke tuba na nge na kusumba wolo yina ba me meka  
na tiya, ti nge ke kuma mvwama; . . .bilele ya mpembe,  
yina nge lenda lwata, mpe nsoni yina ya nge ya kinkonga  
kumonana ve; mpe pakula meso ya nge na nkisi ya meso,  
ti nge lenda mona.*

*Munu, mu ke sungikaka mpe ke sembaka bayina  
nyonso mu ke zolaka: vwanda na kikesa, mpe balula  
ntima.*

36 Beno zaba, kisika mosi kuna na kati, mutindu mu vwandaka tanga, mu . . .Kana beno lenda lemvočila munu mwa ntangu fioti, mu—mu me mona mwa kisika yina me wakana mbote samu na munu, mpe mu zaba kaka ve kisika ya vwandaka ntangu yayi. Yawu yayi.

*. . .mpe zaba nge ve . . .muntu ya kiadi, . . .muntu ya  
mawa, . . .mputu, . . .mpofo, . . .kinkonga:*

37 Oh, la la, yina kele kifwani ya dibuundu ya bubu yayi! Ntangu yayi, ya kele, mu—mu banza ti nsungi ya dibuundu yina awa, yina beto ke na kuzonzila . . . Ya kieleka, mu ke na nsungi ya dibuundu yina ke basika ntangu yayi na babuku. Kasi na yina ya kele Nsungi ya Dibuundu ya Laodicée na kati ya yina beto kele, beto tala kaka na nkadulu ya yawu.

38 Mu ke zola ve kubaka dilongi mosi to kima mosi, samu beto kele ve . . .beto ke tuba kaka na mutindu ya malembe, mutindu beto ke mona kuzonza na zulu ya nyonso yina Mfumu ke twadisa beto na kusala, kasi kima yina ke sadisa beto.

39 Beto banza na Nsungi ya Dibuundu ya Laodicée mpe mutindu ya yawu bubu yayi. Na mutindu mu me zaba, mu ke mona ve kima mosi ke kanga nzila, na ntangu yayi, na

Nkwizulu ya Mfumu Yesu, kana ti Dibuundu ya Yandi kele ve ya kukubama. Mu banza ti mosi ya baprofesi. . .

<sup>40</sup> Mazono, ntangu beto vwandaka kwisa na ditoma, beto salaka bilumbu zole, katuka na Tucson, tii awa, bakilometele mafunda tatu, Billy na munu. Mpe na yina beto, ntangu yayi, beto bukaka musiku mosi ve ya nzila. Beto vwandaka kaka ya kusungama. Mu vwandaka kuna, kana yandi ke nata ditoma, mpe mu—mu ke kanga—kanga dikofi ya munu pene-pene ya yandi mutindu munduki ya kuzomba. Kana mu me mona yandi me luta. Mu ke tubaka, “Vingila fioti, mwana.”

Ntangu yayi, ba me tuba na beto, “Pesa na César yina kele ya César.”

<sup>41</sup> Na yina ntangu beto me kuma awa mazono na mpimpa, mwana-kento mosi ya fioti vwandaka me tandama kuna na nzila, pene ya bamvula tatu; mama kufwaka kuna na kati ya dibulu yina vwandaka na lweka. Mwana-bakala mosi ya kulawuka malafu yina katukaka na R.O.T.C., yandi vwandaka na bamvula kumi na nana, vwandaka nata ditoma na bakilometele nkama mosi na makumi yivwa na ngunga mosi, na lweka ya diboko ya kikento, ya kufwa. Mpe mu banza ti yandi vwanza kufwa, mpe. Kuna beno lenda bakula yinki ya kele.

“Beni pesa na César yina kele ya César.”

<sup>42</sup> Bantu yina me zaba diambu ve ke na kufwa. Mwana-kento yayi ya leke me zimvisa luzingu ya yandi, samu na soda yina me lawuka malafu, beno me mona, yina vwandaka nata ditoma na ba-kilometre nkama mosi na makumi yivwa na ngunga mosi, na lweka ya yimbi ya nzila. Yandi mataka na zulu ya mongo, mpe yandi bulaka bawu, mpe yandi kufwaka bawu nyonso kintwadi kuna. Mu. . . Yandi vwandaka kufwa, mpe. Na yina na manima beno lendaka mona, ata mpe bantu yina zaba diambu ve vwandaka kufwa. . .

<sup>43</sup> Ntangu yayi mwana-bakala yina me kubwa kitumbu ya kufwa bantu na menga ya madidi. Beno me mona? Mu banza kana ba me kanga muntu mosi na volant, yina me lawuka malafu, yandi fwana kuzwa kitumbu ya bamvula kumi, na boloko, samu na kuzengaka luzingu ya bantu. . . ya kele kukanisa kufwa bantu; muntu nionso, samu ti yandi. . . muntu nionso.

<sup>44</sup> Beto, beto ke sala ata fioti ve kima ya mbote na politiki. Ya kele ya kupola. Dibanza ya Nzambi kele ya kuvwanda na ntinu, ntinu ya kudedama, ya kele mbote. Kasi na politiki ya kele kaka ya kumwangana, beno lendaka sumba konso kima yina; kuyiba, kutuba luvunu, kuyiba, bima nionso yankaka. Mutindu mu tubaka yawu na mwa Balumingu me luta: mpe mu ke tala kisika beno kele, beno me mona, kima yankaka ve kasi kaka bima ya kutengama yina ba me vukisa. Kasi ntinu ya kudedama lenda sala misiku ya yandi mosi. Mpe beno lenda kufwa muntu



mosi; kana beno me zabana na politiki, ya kele mbote mingi, beno ke basika na diambu yina. Beno me mona? Mpe na yina, ya ke, ya—ya ke. . .

<sup>45</sup> Democratie kele dibanza ya mbote, kasi ya ke sala kima mosi ve. Kaka mutindu communisme, kuvwanda na bima nyonso na kimvuka; ya ke wakana mbote, kasi ya ke tambula mbote ve. Ve. Dibanza ya Nzambi na kuvwanda na ntinu, mutindu David vwandaka, vwandaka ya kusungama, mpe beno kele na dibanza mosi yina ke yala. Mutindu ntwadisi mosi mpe nkonga ya ba-oie, to nyonso yina, beno lenda ve kubaka zole to tatu ya bawu. Na yina, ntangu beno ke vukisa yawu nionso kintwadi, beno ke kuzwa dibanza ya konso mutindu yina.

<sup>46</sup> Na yina beto ke mona na mitindu, ya bubu yayi, nionso kele ya kukubama samu na Nkwizulu ya Mfumu.

<sup>47</sup> Kasi, na yina Mpangi Neville mpe munu, mpe bampangi ya babakala yankaka yayi ke na kumeka na kutwadisa nkonga ya mameme, mu ke na kima mosi na dibanza ya munu ntangu yayi, yina ke kwisa, yina beto lendaka zonzila.

<sup>48</sup> Ya kele, mu kuzwaka mukanda kilumbu yankaka yina ya mama mosi ya mbote. Mu kuzwaka yawu ve; ya kwizaka na nzila ya muntu yankaka. Mpe ya kieleka ya vwandaka panza munu bitini-bitini, to vwandaka meka na kusala yawu. Yandi vwandaka tuba, “Benno me. . . Benno lenda ve beno Bantu ya Mumbongo ya Baklisto kusala kima mosi samu na kusukisa Mpangi Branham?” Yandi tubaka, “Samu ti yandi me basisa buku yayi ntangu yayi yina ba ke bokila *Nsungu ya Dibuundu Ya Laodicée*, yandi ke basisa diaka kulutula mingi.” Mpe yandi tubaka, “Yandi ke panzaka kaka malongi ya Pentecote.” Yandi tubaka, “Ntangu yayi yandi ke na kuzonzila ti nzikisa ya ntete kele ve kuzonza na bandinga.” Mpe yandi tubaka, “Na yina, yandi ke telemina milongi ya bakento.” Mpe yayi vwandaka mulongi ya kento. Mpe bana ya yandi ya babakala, bankundi ya kulutula mbote yina mu kele na yawu na yinza. Yandi. . . Bawu kele na kati ya bankundi ya kulutula mbote yina mu kele na yawu. Mpe yandi tubaka, “Ntangu yayi. . .”

<sup>49</sup> Mpe bakala yayi na kento ya yandi, mu vwandaka kudia madia ya suka na bawu; bawu tubaka, “Mpangi Branham, tala yayi. Nge ke banza yawu?” mpe bawu basisaka mukanda.

Mu tubaka, “Mbote, mpangi ya kento, yandi ke na kubakula kaka ve.”

<sup>50</sup> Bana-bakala yayi tubaka na munu ti mama ya bawu vwandaka mulongi ya kento, mpe ti yandi vwandaka ndima ve Nsangu.

<sup>51</sup> Mpe ntangu yayi yandi me tuba awa, yandi me tuba, “Ntangu yayi yandi me tuba, ‘Bakento lendaka ve kuyala na zulu ya babakala.’” Yandi tubaka, “Wapi mutindu samu na Phoebé na kati ya Biblia, nsadisi ya Paul?”

52 Ya kieleka, yandi vwandaka teka bima. Mpe Paul yufulaka bantu . . . Beno banza ti Paul ke tuba, “Bakento fwana kuvwanda swi na mabuundu, mu ke pesa bawu muswa ya kuzonza ve,” mpe yandi ke baluka mpe ke tuba, “Ntangu yayi, Phoebé, nsadisi ya munu na Nsangu ya mbote, yandi ke longi na mwa bankokila?” Oh, yandi ke telemina ndinga ya yandi mosi. Beno me mona?

53 Mpe yandi tubaka, na yina, samu na kunwanisa nionso yina (mu ke kwikila ti ya vwandaka Esther, vwandaka mosi ya bazuzi na kati ya Biblia.), yandi tubaka, “Kento mosi vwandaka zuzi na kati ya Biblia. Kana yina kele ve kuyala na zulu ya babakala!”

54 Mpe muntu yayi ya mumbongo belukaka awa na yinzo-Nzambi ntama mingi ve, yandi tubaka . . . Ntangu yayi, kento ya yandi tubaka, “Mpangi Branham, yina vwandaka yangisa munu ntangu nionso.”

Mu tubaka, “Kasi, mpangi-kento, wapi mutindu yina lendaka yangisa nge?”

Yandi tubaka, “Mbote, awa kele zuzi ya kento.”

55 Mu tubaka, “Yina kele politiki, dibuundu ve. Yina ke sala kima mosi ve na dibuundu.”

56 Paul tubaka, “Bika bawu kutumama, mutindu mpe me tuba musiku.” Mpe musiku lenda ve kutula kento samu na kuvwanda nganga-Nzambi; ya lenda ve kutula yandi. Ata mbala mosi ve ti beno me monaka nganga-Nzambi ya mbuta ya kento. Ata mbala mosi ve ti beno me monaka nganga-Nzambi ya kento, kisika mosi ve na kati ya Biblia. Ata mbala mosi ve ti beno me monaka mulongi ya kento, na kati ya Biblia. Kieleka.

57 Bayankaka na kati ya bawu vwandaka baprofete ya bakento, mpe nyonso yina; Miryam mpe bayankaka. Mpe Esther . . . Mosi ya bawu vwandaka zuzi na zulu ya Israel. Bantangu yankaka bawu vwandaka bantinu ya bakento na zulu ya bawu, mpe nionso mutindu yina, ntinu mpe ntinu ya kento. Na lufwa ya ntinu, ntinu ya kento vwandaka baka kisika ya yandi tii bawu ke sola ntinu yankaka, mpe nyonso yina.

58 Na—na Tucson, na Arizona, beto kele na zuzi ya kento kuna na mbanza. Ya kele samu na yina mbanza kele ya kupola mingi. Mpe beto kele . . . Kento kele ve na kima ya kusala na politiki. Yandi kele ve na kima ya kusala na kati ya . . . luyalu mosi na kati ya dibuundu.

59 Kisika ya yandi kele kuvwanda ntinu ya kento samu na bakala mosi na yinzo. Na nganda ya yawu, yandi kele na kima mosi ve. Mpe beto zaba ti ya kele Kieleka. Beno ke kuzwa ata fioti ve . . . Mu zaba ti ya ke wakana mutindu kima ya ntama, kasi mu ke na kizitu.

60 Mpe mu zaba ti, na manima mu ke katuka ntoto yayi, babande yayi mpe babuku yayi ke landila na kuzinga, mpe mingi

ya beno bana ya fioti ke mona, na bilumbu ke kwisa, ti yayi kele Kieleka, samu mu ke tuba yawu na Nkumbu ya Mfumu.

<sup>61</sup> Ntangu yayi, beto ke kukiyufula wapi mutindu kento, yina kele kento ya mbote, mpe ba me nata yandi na zulu ya ntoto yayi na bakala ya yandi ya kukwikama, bakala mosi ya mbote, bana-babakala ya kulutila mbote yina mu me kutanaka ntete ve, bawu kele babakala, yina mu me kutanaka ntete ve. Mpe kaka na nswalu, kaka ntangu bawu kuwaka Nsangu, bawu ndimaka Yawu, nkama na zulu ya nkama. Ntangu yayi, yina zolaka kwiza kaka na nzila ya nsodolo ya ntete, mutindu mosi kaka ya lenda kwiza.

<sup>62</sup> Ntangu yayi, kyuvu kele, awa. Mu vwandaka banza ti, beno me mona, ntangu yayi samu na yinki Mfumu me vutula munu kuna. “Mpe nge zaba yawu, nge zaba ve. . . Nge zaba yawu ve; nge kele kinkonga, muntu ya mawa, ya mawa, mpofu, mpe nge zaba yawu ve.”

<sup>63</sup> Ntete mu kuma na kisika yina, mu lenda pesa dibanza ya muvimba samu na yina mu tubaka na mwa bilumbu me luta, awa na Nsangu, mu banza ti ya vwandaka, *Nzambi Ya Yinza Yayi*; yina me kufwa meso ya bantu, ti ya kieleka bawu ke sambilaka diabulu na bisalu ya nsambulu. Beno nionso me bakula yawu? Beno nionso me bakula yawu? [Dibuundu me tuba, “Amen.”—Mu.]

<sup>64</sup> Mpe kuna na Nsangu mosi yina, mu longaka dilongi, ti, kento yina me lwata bilele ya kukondwa buzitu, ya mansoni, na Kiti ya Lufundusu, ba ke fundisa yandi mutindu kento ya kindumba. Ya ke monana kima ya ngitukulu.

Beno bika mu talisa beno mwa kifwanisu mosi.

<sup>65</sup> Ntangu yayi, awa kele nzonzi na mbanza, ntwenya ya bakala, mpe yandi kele muntu ya mbote. Samu na yina—na yina me tala politiki, mu banza ti ya lendaka vwanda ya kusungama, politiki ya yandi. Mpe na manima yandi ke kwenda na mwana-kento yina me zabana mingi. Bawu ke kubwa na zola mpe ke kwelana. Bawu ke kwenda na mikembo mpe na bima ya nene, mpe bawu nyonso ke kunwa kintwadi. Na nsuka, yandi. . . Yandi kele na yinzo ya mbote. Yandi ke zingaka na bamfinangani ya mbote. Yandi kele na lukumu na kati ya bantu. Kasi yandi. . . Bawu zole ke kunwaka malafu. Yandi ke lwataka bakupe, ke zengaka bansuki ya yandi, ke tula maquillage, bima nionso na mutindu ya mvwatulu ya yimbi, kento ya kitoko yandi ke na kukitalisa yandi mosi. Mbote, ata mbala mosi ve ti yandi ke kwendaka na yinzo-Nzambi, ata fioti ve, to dyaka mosi ya bawu ve.

<sup>66</sup> Kuna, me kwiza kota, na lupangu na lweka ya bawu, kento mosi ya dibuundu ya Baptiste to ya dibuundu ya ba-Methodiste, yandi mpe bakala ya yandi. Ntangu yayi, kento yayi. . .

<sup>67</sup> Beto tuba ti yandi kele Methodiste, samu ti ba-Methodiste me natama fioti mingi na busantu kulutila ba-Baptiste; bawu

nyonso kukatula kaka ba-Baptiste ya Ngwisani ya Malu-malu, bawu ke kwikilaka na busantu. Kasi, na bantangu mingi, ba-Baptiste ke kwikilaka ve na busantu ata fioti ve, beno me mona. Ba ke kwikilaka ve na kima ya mutindu yina. Na yina, ntangu yayi, beto tuba ti yandi kele Methodiste samu ti bawu ke kwikilaka na busantu.

<sup>68</sup> Mpe na yina kento mosi ya Methodiste me kota na lupangu yina kele na lweka ya kento yayi, na bala-bala mosi. Bakala ya yandi kele. . . Beto tuba ti yandi kele comptable, mpe, to, yandi ke salaka na bureau mosi. Mbote, kento ya Methodiste yayi ke tala kento yina yankaka.

<sup>69</sup> Mpe ntangu nzonzi yayi ke basika na mbanza. . . Nkumbu ya yandi kele John; beto tuba nkumbu ya yandi kele John. Ntangu yayi, beno banza ve na yawu ntangu yayi. Mu ke pesa kaka bankumbu mutindu yina ntangu yayi. Mpe nkumbu ya yandi kele John. Mbote, yandi vwanda basikaka na Ralph. Mpe yayi kele nkumbu ya disolo, diaka, beno me mona, kaka samu beno bakula disolo, samu na kutendula na beno tablo.

<sup>70</sup> Mbote, kima ya ntete beno zaba, na kulawuka malafu ya bawu, ya ke salama ti Ralph ke bumba diaka yandi. Mbote, yandi ke pela diaka, samu yandi me kubwa diaka na zola na Ralph, yandi ke banza. Na yina, na manima ya mwa ntangu fioti, Ralph ke banda na kukutana na yandi. Mpe yandi ke yilama samu ti John, kumona kima ve. Mpe kento yayi ke banza ti yandi kele kento ya mayele mingi, samu yandi lenda basika na Ralph, na yina yandi kele ya kukwelana na John. Beno me mona, kento yayi kele ve na mwa ndambu ya bumuntu, mpe yandi ke banza kima mosi ve samu na yawu.

<sup>71</sup> Kasi kento yayi ya Methodiste me mata na kisika ya zulu. Kasi yandi, na kutala, ke kwendaka na yinzo-Nzambi, mpe yandi ke banza ti kento yina kele yimbi mingi. Na yina, yandi ke tuba na bakala ya yandi, ntangu yandi ke vutuka, “Mu ke mona bakala yina ke kota kuna mpe ke kutana na yandi. Mpe ntangu John me kwenda kusala kisalu samu na dyambu mosi kisika mosi kuna, na Philadelphie to kisika mosi, yandi ke nata yandi na roadster ya yandi, mpe bawu ke tandama kuna na plage. Mu ke mona bawu ke vutuka na yinzo; bantangu yankaka ba ke benda ve barido, ke yamba yandi mpe ke sala zola na yandi, mpe. . . Oh, yina kele yimbi ve?” yandi ke tuba na bakala ya yandi. “Oh, yandi kele kima ve kasi ndumba ya pwelele.” Ya kele kieleka. Yandi kele yimbi mingi kulutila kento ya kindumba ya pwelele, samu ti yandi kele kento ya makwela. Beno me mona? Mpe yandi, kento yayi, kento yayi ya Methodiste, ke banza ti ya kele yimbi, yandi ke kwendaka ata fioti ve na yinzo-Nzambi.

<sup>72</sup> Ntangu yayi, kento ya Methodiste yayi lendaka sala kima ya mutindu yina ve. Ve, ata fioti ve. Yandi kele kento mosi ya mbote. Mpe kima yankaka, yandi lendaka ve kusimba whisky ata

fioti, samu, dibuundu ya Methodiste, makumi yivwa na zulu ya nkama mosi ya manaka ya bawu kele kupekisa wiski, kupekisa wiski. Na yina, ba ke na manaka ya kupekisa, mpe bantu yayi ya dibuundu yina ya ba-Methodiste ke zingaka na zulu mingi ve kulutila yina dibuundu ke longaka.

<sup>73</sup> Kasi kento yayi, kento ya Methodiste yayi, ke basika, na nkokila, na bakala ya yandi, yandi ke lwata bakupe na Lumingu, na manima ya lukolo ya Lumingu. Yandi ke zenga bansuki ya yandi. Yandi ke tula rouge à lèvres, mpe ke kunwaka makaya fioti.

<sup>74</sup> Ntangu yayi, na kati ya Ndinga ya Nzambi, ba kele bandumba, kasi *yayi* awa kele “kinkonga, muntu ya kiadi, ya mawa, ya mpofo, mpe zaba yawu ve.” Mosi yayi kele kaka ya kubwa mutindu yankaka, samu, “Bakala yina ke tala kento, samu na kulula yandi, me sala yimeni pite na yandi na kati ya ntima ya yandi.”

<sup>75</sup> Mpe kana kento yayi, ntangu yayi, yandi ke tuba, “Vingila fioti, Tata Branham. Mu ke nata nge na kubakula, mu kele kento ya kindumba ve.” Mpangi ya munu ya kento, mu banza kana ba me nata beno na ntwala ya Biblia, mpe beno ke tula maboko ya beno na zulu ya Yawu na Mvwandulu ya Nzambi, mpe kuzenga ndefi ti beno ke vwandaka kaka ya kukwikama—ya kukwikama na bakala ya beno mutindu beno zolaka vwanda. Nzutu ya beno kele samu na bakala ya beno, kasi moyo ya beno kele ya Nzambi. Ya kele na mpeve ya yimbi yina me pakula beno. Kana ti, kana beno ke mutindu yina ve, na yina beno kele. . . Mu lenda talisa ti beno kele ya muvimba kilawu.

<sup>76</sup> Yinki zolaka salama na nkooko ya beno ya kento kana yandi zolaka basika na bala-bala na bakupe? Bawu ke tula yandi na yinzo ya bilawu; yandi basikaka kukondwa robe ya yandi. Kima mosi ke tambula mbote ve na mabanza na yandi. Kana yawu vwandaka mutindu yina na ntangu yina, yawu ke mutindu yina ntangu yayi.

<sup>77</sup> Na yina ya ke losa yinza ya muvimba na kati ya bulawu. Kima ya muvimba na kati ya bulawu. Mpe yawu ke kota malembe-malembe ti bantu ke zaba yawu ve.

<sup>78</sup> Ntangu yayi, yandi kele kento ya kindumba? Ve na bakala ya yandi, samu na nsilulu yina yandi salaka samu na nzutu ya yandi. Kasi, na ntwala ya Nzambi, yandi me kuzwa mpeve ya yimbi, mpeve ya kindumba na zulu ya yandi, yina ke sala ti yandi kulwata mutindu yina. Mpe yandi kele na Nsungu ya Dibuundu ya Laodicée, mpe zaba ve ti yandi ke na kusala yawu. Kento yina zaba diambu ve zaba ti Nzambi ke sambisa yandi mutindu kento ya kindumba. Yawu yina.

<sup>79</sup> Beno ke nata yandi na kubakula Yawu; beno lenda ve kutuba na yandi. Ya kele ve na mutindu ya kunata yandi na kubakula

Yawu. Biblia ke tuba, “Bawu kele kinkonga mpe bawu zaba yawu ve.”

<sup>80</sup> Kana beno ke bokila yandi kento ya kindumba, muntu ya mutindu yina, yandi ke kanga beno. Yandi ke sala yawu. Mu ke zonzaka ata mbala mosi ve na muntu. Mu ke zonzaka samu na disumu. Mu ke tubaka ve, “Dibuundu *yayi*, Tata *Kingandi* kuna, Révérend *Kingandi*, yandi kele. . .” Ve, ve. Mu ke tubaka ti, malongi ya yina, beno me mona, nionso kintwadi. Mu ke tangunaka muntu ve. Ya kele ve samu na bantu. Ya kele sysiteme yina bawu kele na yawu. Ya kele sysiteme ya yinza.

<sup>81</sup> Mpangi George Wright yina me vwanda awa kele. . . Yandi kele na bamvula makumi sambwadi na tanu to makumi sambwadi na nana, mu banza. Yinki beno ke banza ti ya zolaka salama kana beno zolaka kwenda mona Mpangi-kento Wright kilumbu mosi, mpe yandi ke vwanda ya kutelama kuna na bakupe? Oh, beno zolaka ata fioti ve, beno zolaka—beno zolaka kukanga kento yayi na yinzo. Beno zolaka kwelana na yandi ata fioti ve. Mbote, kana ntwenya mosi ya bakala na kilumbu yina zolaka sala yawu, kima mutindu mosi zolaka salama. Mbote, kana ya vwandaka disumu mpe yimbi na ntangu yina, ya kele kima mutindu mosi; kasi bantu me kula na kati ya bulawu.

<sup>82</sup> Bika mu pesa profesi ya kima mosi na beno, kaka ntete yawu kusalama. Yinza ya muvimba ke na kuvukana na kati ya bulawu, mpe ke kuma yimbi mingi mpe yimbi mingi mpe yimbi mingi, tii ba ke vwanda nkonga ya bilawu. Mpe ya ke monana mutindu yina na ntangu yayi.

<sup>83</sup> Beno lenda banza ti muntu lenda nata ditoma na minda ya yandi ya kufwa, na lweka ya yimbi ya nzila; ricky mosi, mwana-bakala ya ntwenia, ti yandi me basika na lukolo ya secondaire, me kufwa nkonga ya bantu. Yina ke sukisa bawu? Yina me landa me kwisa kaka na manima ya yandi, yandi ke na kusala kima ya mutindu mosi. Beno lendaka banza ntwenia ya bakala yina ke kukipesa luzitu. . . yina ke kukipesa luzitu yandi mosi, ke basika kuna mpe ke sala mambu yina bawu ke sala?

<sup>84</sup> Beno lendaka banza na kento mosi ya ntwenia, mpe na buntwenia ya bukeno, ya kitoko, ya kutungama mbote, na nzutu ya mbote, na ntela ya mbote, kizizi ya kitoko, ya kitoko; mpe kaka kitoko na yandi ke talisa ti beto me kuma na ntangu ya nsuka. Beno me mona, yandi me baka mbandu na bima ya yinza, bima ya yinza mpe kitoko ya busantu ve, lembami na moyo ya yandi. Mu me monaka bakento, na nganda ya bawu vwandaka na kima ya kutala ve, kasi beno tuba na bawu mbala mosi, beno solula na bawu mwa ntangu fioti, ba kele na kima ya kieleka ya kisina yina beno lenda bika ve. Beno me mona, kitoko ya ngaanda kele ya dyabulu, ya kele ya yinza.

<sup>85</sup> Beno tala bana ya Caïn, mutindu bawu kubwaka na kati ya yawu. “Ntangu bana ya babakala ya Nzambi kumonaka bana ya

bakento ya bantu kitoko, bawu bakaka samu na bawu bakento,” mpe Nzambi ata mbala mosi ve lemvokilaka bawu.

<sup>86</sup> Beno tala, ntangu bakento yayi ya ba-Israélite na—na maboko ya bawu ya ngolo, mpe bansuki ya bawu ya ngolo mutindu bansinga; ntangu bana ya Nzambi yayi lutaka na ntoto ya Moab, mpe kutanaka na bakento yayi vwandaka ya kulengula na bansuki ya bawu ya kuzenga, mpe ya kuyidika mbote-mbote, mpe na manicure na bizizi ya bawu, to nionso yina beno ke bokilaka yawu; mpe ntangu bana ya babakala yayi ya Nzambi kumonaka bakento yayi ya kitoko mingi, profete ya luvunu tubaka, “Beto nionso kele mutindu mosi.” Mpe bawu kwelaka na kati ya bawu, mpe ata mbala mosi ve ti Nzambi lemvokilaka bawu.

<sup>87</sup> Bawu kufwaka na ntoto ya kuyuma. Mosi na mosi ya bawu kufwaka kuna, kukondwa kivuvu, kukondwa Nzambi, mpe ya kele kuzimbana ya Seko; yina me fundisama kukonda nsuka, ata ti bawu monaka mambote ya Nzambi, ata ti bawu kunwaka na kiziba yina me yumaka ata fioti ve. Bawu kunwaka na ditadi yina ba bulaka. Bawu monaka nioka ya bisengo ke sala bimangu. Bawu basikaka na nsi ya mbotika ya Moise na mubu. Bawu monaka diboko ya Nzambi. Bawu kudiaka madia ya Bawanzio, mpe salaka bima yina nionso. Kasi ba kwelaka kuna, bakento yayi bakaka bawu, mpe bawu kwelaka na kati-kati ya bawu. Bawu salaka ve pité, bawu kwelanaka kaka na bawu; Nzambi ata mbala mosi ve lemvokilaka yawu.

<sup>88</sup> Ya kele mbala ya zole ya me salama. Ntangu yayi awa beto kele na mbala ya tatu, ya luvunu mingi kulutila na ntangu yina me luta.

<sup>89</sup> Mu zaba ti ya kele mpasi. Mpe ba ke yufulaka munu bambala mingi, na mitindu mingi, wapi mutindu ya ke salama? Samu na yinki mu fwana kutuba na bantu na mutindu ya ngolo? Yinki ke salaka mutindu yina? Mpe kasi, mu me bakula, kana ya vwandaka ve Nzambi, ya zolaka vwanda ve na muntu, kento mosi ve yina zolaka vwanda mpe kuwa munu. Kasi ba ke vutuka, samu ti ya kele na muntu yina kele na mwa kizundu ya Kieleka kuna, yina zaba ti Ya kele kieleka. Ata mutindu yina, bawu zaba ti Yawu kele kieleka. Ntangu yayi beno tala mbote yinki ke salama. Mu zaba ti yawu kele mpasi.

<sup>90</sup> Ya kele kaka mutindu kana dokotolo me pesa beno nkisi, mpe beno me manga na kubaka yawu, na yina beno semba ve dokotolo kana beno me kufwa. Mpe Yayi kele mutindu nkisi. Wapi mutindu samu na bantu yayi ntangu nionso ke tubaka na munu ti mu kele muntu yina ke yinaka bakento?

<sup>91</sup> Beno me mona, beno tala kaka mutindu bakento ke na kusalaka, mpe mu ke lakisa beno kisika dibuundu kele. Bakento ya bikalulu ya mbote kele na Laodicée, na yinza, na mutindu ya nzutu, “kinkonga, muntu ya kiadi, ya mpofu, mpe zaba yawu

ve,” bantu, bakento ya yinza. Mpe dibuundu keke na kitezo mosi. Beno tala mbote mutindu kima ya kimuntu keke kifwanikisu ya kimpeve, kaka, ntangu nyonso. Ntangu yayi, kilumbu mosi na Kiti ya Lufundusu. . .

<sup>92</sup> Mu zaba ti ya keke ve ya kuzabana mingi na kutuba yawu. Mpe kana muntu mosi me tumama ve na kutuba yawu, ya ke kulutila mbote ti beno sala yawu ve; samu ti beno ke mekula, mpe na yina beno ke kuzwa mpasi, ya kieleka.

<sup>93</sup> Ntangu yayi beno tala. Kieleka, mu ke talana mutindu, na bantangu yankaka, mu me zibula yinwa ya kento mosi mpe mu vwandaka tiamuna Nkisi na yinwa ya yandi, mpe na manima mu ke tula maboko ya munu na yinwa ya yandi, mpe yandi ke basisa Yawu konso ntangu. Yinki kana dokotolo salaka yawu na mbevo, na yina mbevo kufwa samu ti yandi mangaka na kumina nkisi? Na Kiti ya Lufundusu, ntangu bima yayi nionso ke zolaka bansuki ya kuzenga mpe kulwata bakupe mpe. . .

<sup>94</sup> Mu ke na kutunga kaka. Ngunga me kuma pene-pene ntangu beno ke mona kima mosi kusalama, ntangu kima mosi ke salama. Mpe mbandukulu nyonso yayi awa me vwanda kaka lufulu samu na Nsangu mosi ya nkufi, ya nswalu yina ke ningisa bayinsi nionso.

<sup>95</sup> Samu na yinki mu vwandaka kunganina bakento, yawu vwandaka kaka awa samu kima mosi vwandaka kubama yina lendaka tula musapi, na yawu. Mu vwandaka meka na kutuba na bawu yina keke kieleka. Mpe mu vwandaka simba diboko mutindu *yayi*, mutindu na yinwa ya bawu, mpe bawu vwandaka basisa Yawu. Na yina nani lenda semba dokotolo?

<sup>96</sup> Wapi mutindu beno ke tuba, na Kilumbu ya Lufundusu, ntangu bandinga yina bokaka samu na kutelemina yawu, ke bula bande kaka kuna na ntwala ya bantu? Na yina wapi mutindu ba ke tina yawu?

<sup>97</sup> Ba ke basisa Yawu na kati ya misapi ya beno. Beno ke tiamuna yawu diaka, mpe na nsuka ba ke ningisa yintu ya bawu mpe ke dasuka, mpe ba ke kwenda, ke sala yawu ve. Kasi, beno ke vutuka dyaka mpe ke tiamuna Yawu dyaka. Na yina nani ba ke nganina? Dokotolo ve, Nkisi ve, kasi mpkadulu ya muntu. Ya kieleka. Ya ke vwanda kilumbu mosi ya mpasi, mosi ya bilumbu yayi, ntangu nsungi yayi ya disumu ya kindumba ke telama na ntwala ya Nzambi ya Ngolo nyonso.

<sup>98</sup> Mu ke mona ti bamvula ya munu ke na kukangama, mapeka ya munu ke niefwama; mpe, mu zaba, bamvula makumi tatu awa na estrade yayi, yinga, bamvula makumi tatu na tatu na tatu awa na kilanga. Yina ke luzingu ya yinda. Ya keke bamvula makumi tatu na tatu ya kisalu. Mu ke kaka na kiadi mosi; ti mu me kuzwa ve bamvula nkama mosi na makumi tatu na tatu ya yawu. Samu ti yayi ke vwanda bweso ya nsuka yina mu ke kuzwa, mutindu muntu yina ke kufwa, samu na kulonga



Nsangu ya mbote. Nzambi sadisa munu na kuvwanda kieleka ya kukwikama, na Ndinga yango, mpe kutuba kaka mutindu Yandi ke tuba.

<sup>99</sup> Yinki salaka ti kento yina ya Methodiste. . . Wapi mutindu beno lenda sala ti yandi bakula Yawu? Yandi yayi, na Nsungi ya Dibuundu ya Laodicée.

<sup>100</sup> Ntangu yayi beto ke baka kento ya Pentecote. Yandi zolaka lwata ve bakupe, ba-maquillage, to kuzenga bansuki ya yandi, kasi yandi ke tala na nsi kuna na Methodiste, ke tuba, “Beni tala kento yina ke sala *yayi-mpe-yayi!*” Beto ke tuba ti kento yango ke lwataka ve bakupé, kasi yandi ke tuba. . . mpe yandi mosi na bansuki ya kuzenga. Beni me mona?

<sup>101</sup> Kulutila mingi beno ke mata na Nzambi, kulutila mingi ya ke monana ya disumu nionso yayi. Mpe na manima bantangu yankaka, na bisambu, beno lenda banza, ntangu Mpeve-Santu ke nata beno na kitezo, kuna kima kima nyonso ke talana potopoto. Na yina ntangu beno ke kwisa kuna, beno ke monana mutindu beno kele, samu na bantu, beno kele muntu ya mubulu, ti beno kele—beno kele kima yankaka ve kasi muntu ya kiboba ya kudasuka. Beni kele kilawu, samu beno me telama kuna mutindu muntu ya kiboba ya makelele mpe ntangu nionso ke nganina bantu. Kasi kana beno me mata ve na bitezo yayi na ntangu mosi, kisika beno lenda vwanda na Mvwandulu ya Nzambi (ve na nzila ya emotion, kasi na kuvwandaka ya kuzanguka na Mpeve-Santu ya kieleka), kima nyonso kele ya kusonika, “ICHABOD.” Nkembo ya Mfumu me basika na badenomination nionso. Ya kieleka. Ata mosi ve na kati ya yawu kele kieleka.

<sup>102</sup> Ntangu yayi bika mu sadila beno mwa selekele. Kana mu vwandaka na tablo ya ndombe. . . Kasi mu zola ti beno tala mbote awa. Mu ke sala selekele mutindu *yayi*, mpe mu ke sala selekele yankaka na kati ya selekele yina, ya kele zole, na manima mu ke sala selekele na kati ya selekele yina. Ya kele basekele zole, basekelele zole. Ntangu yayi, yayi kele beno.

<sup>103</sup> Ya kele Nzambi. Nzambi na butatu kele Mosi, mpe kukondwa butatu Yandi kele ve Nzambi. Yandi lenda talana ve mutindu yankaka.

<sup>104</sup> Mpe beno lenda ata fioti ve kukitalisa kukondwa kuvwanda muntu ya butatu yina beno kele, yina kele: nzutu, mpeve, moyo. Kukondwa mosi ya yawu, beno kele ve ya kulunga. Beni me mona? Kana beno vwandaka ve na moyo, beno zolaka vwanda kima mosi ve; kana beno vwandaka ve na mpeve, beno zolaka vwanda kima mosi ve; kana beno vwandaka ve na nzutu, beno zolaka vwanda kaka mpeve, nzutu ve.

<sup>105</sup> Na yina, Nzambi kele ya kulunga na kati ya kimvuka ya butatu ya Muntu mosi; ya kele ve kimvuka ya butatu ya *bantu*, kasi Muntu Mosi na kati ya kimvuka ya butatu. Tata,

Mwana, mpe Mpeve-Santu kele Nzambi mosi ya kieleka yina me monisama. Nzambi!

<sup>106</sup> Beno tala awa, beno vingila kaka, mu—mu banza ti mu me tanga yawu kaka mwa baminuti fioti me luta. Beno kuwa yayi.

*. . .sonika na wanzio ya dibuundu ya . . .Laodicée;  
Bima yayi me tuba Amen, mbangi ya kukwikama mpe  
ya kieleka, mbandukulu ya luvangulu ya Nzambi;*

<sup>107</sup> Nzambi kele Mvangi. Mpe wapi mutindu Yandi vangaka? Kasi yayi kele “mbandukulu ya luvangulu ya Nzambi.” Ntangu Nzambi, Mpeve, vangamaka na mutindu ya Muntu, yina vwandaka Nzambi yina ba vangaka; Nzambi Mvangi, Yandi mosi, me kuma luvangulu. Nzambi, Yina salaka ntoto, salaka calcium, salaka potasse, nsemo ya yinza, pitilodi, bakaka kima kintwadi mpe vangaka Yandi mosi, na “mbandukulu ya luvangulu ya Nzambi.”

<sup>108</sup> “Amen,” ya nsuka. *Amen* zola kutuba “ya vwanda mutindu yina.” “Ya nsuka ya Nzambi,” ntangu Nzambi me kuma ya kulunga na kati ya luvangulu ya Yandi.

<sup>109</sup> Ntangu yayi, wapi mutindu ya vwandaka? “Muntu mosi ve me monaka Nzambi, kasi kaka ya Luzolo ya Tata me talisa Yandi.” Beno me bakula yawu?

<sup>110</sup> Beno tuba, vingila fioti, beno sala nswalu ve. Beto baka Colossiens, kaka mwa ntangu fioti. Mu me tala. . .Disonuku mosi na mabanza ya munu. Beto baka Colossiens, Buku ya Colossiens, mpe beto baka . . . mu banza ti ya kele kapu ya Ntete. Mu fwana tala yayi, samu ti ya kele ve yina mu banzaka awa. Na yina mu ke . . . Mutindu mu vwandaka, ntangu mu vwandaka mulongi ya ntwenia, mu lendaka banza na bima yayi kaka na ntangu yayi, kasi na yina mu me kuma mbuta mu lenda ve. [Mpangi Branham me bula misapi ya yandi—Mu.] Beto banda na nzila ya 9, mu banza. “Samu na yina. . .” Paul ke na kutuba na ba-Colossien samu na Klisto, Nani Yandi vwandaka.

*Samu na yina beto mpe, kubanda kilumbu beto me kuwa yawu, beno sukisa ve na kusambila samu na beno, mpe . . .nsatu ti beno lenda vwanda ya kufulukuka na luzabu nionso ya yandi nionso na ndwenga nionso ya mpeve mpe lubakusu ya yandi;*

*Ti beno lenda kutambula ya kulunga na Mfumu na nyonso yina ke sepelisa, yina ke na mbuma na bisalu nyonso ya mbote, mpe kukula na luzabu ya Nzambi;*

*ya kukindisama nionso . . .landila ngolo ya nkembo, ya mvibudulu mpe ya kukwikama na kiese;*

*Na kupesaka matondo na Tata, yina me kutana . . . yina salaka beto kukutana na . . . bayina me vukana na difwa ya basantu . . .*

*Yandi yina me vulusa beto na ngolo ya mpimpa, mpe me bangulaka beto na kimfumu ya Mwana ya yandi ya luzolo:*

111 Awa beto me kuma ntangu yayi. Beno tala mbote.

*Na kati ya yandi beto kele na mpulusu na nzila ya menga ya yandi, ata mpe lemvo ya disumu:*

*Yina kele na kizizi ya Nzambi yina ke monikaka ve na meso, . . .*

112 Beno me bakula yawu? nzila ya 15, Colossiens 1:15.

*. . . mwana ya ntete ya konso kivangu:*

113 Amen! Yinki? “Mwana ya kento ya ntete ya konso kivangu.” Ti ya vwanda Wanzio, ti ya vwanda konso yina ya lendaka vwanda; Yandi kele mwana ya ntete ya konso kivangu.

*Samu na yandi bima nionso salamaka—bima nionso salamaka, yina kele na zulu, to . . . na ntoto, yina ke monana . . . yina ke monikaka ve na meso, ata ti ya kele na bansende, ata ti ya kele na bimfumu, . . . baluyalu, . . . bangolo: bima nionso salamaka na yandi, mpe samu na yandi:*

114 *Brrrrr!* Ya vwanda konso kima yina; ya kele ve na muntu yankaka! Beno tala, “Mpe na . . . Mpe yandi kele kuna . . .”

*. . . yandi kele na ntwala ya mambu nionso, mpe na nzila ya yandi mambu nionso kele.*

115 Ata ti ya kele Tata, Mwana, Mpeve-Santu, nionso yina ya kele, “Yandi kele na ntwala ya bima nionso.” “Na ntwala ya bima nionso yina kele na Zulu, na ntoto; yina ke monika, yina ke monikaka ve, to nionso yina,” Mwana ya Nzambi vwandaka na ntwala ya bima nionso. Ya kieleka? Mu ke kipe ve, ya kele bakiti ya kimfumu, baluyalu, nyonso yina ya kele; Bakiti ya kimfumu ya Mazulu, bimfumu, nyonso yina ya lendaka vwanda na bisika ya nene ya mazulu, na ba-Seko nsuka kisika ya vwandaka; nionso yina ya vwandaka, Bawanzio, banzambi, nionso yina ya vwandaka, “Yandi kele na ntwala ya bima nionso.” Amen! Beno lenda mona Yandi ve? “Yandi vwandaka na ntwala ya bima nionso; mpe nionso vangamaka na nzila ya Yandi. Yandi . . .” Na nzila ya 17.

*Mpe yandi ke na ntwala ya bima nionso, mpe na nzila ya yandi mambu nionso kele.*

116 Ya kele na kima ve yina lenda sala yawu kutambula kasi Yandi. Kana ya kele Nzambi Tata, Nzambi Mpeve-Santu; kana ya kele Bawanzio, bimfumu, bangolo, baluyalu; nionso yina ya kele, bima nionso ke tambula na Yandi. “Bima nionso ke salaka na nzila ya Yandi.” Yandi!

*Mpe yandi kele yintu ya nzutu, ya dibuundu: yina kele mbandukulu—yina kele mbandukulu, mwana ya*

*ntete na kati ya bantu ya kufwa (ya zola tuba, Yandi ke vumbula na lufwa bayina nionso Yandi kwisaka kuvulusa); samu na kuvwanda na bisika ya ntete na bima nionso yandi.*

117 “Lenda vwanda na *kisika ya ntete*,” beno zaba yinki ya zola kutuba? Ya kele, “na zulu ya nyonso.” Yandi kele na zulu ya bima nyonso yina vangamaka ntete; konso Wanzio, konso muntu, konso—konso kima yina kele. Yandi kele na zulu ya bima nyonso. Wapi Kivangu Yayi kele? Nani ya lenda vwanda? Na zulu ya bima nyonso! “Mpe vwanda kuzwa ngemba. . .” Beto mona, kaka minuti. Kisika ya nte- . . .

*Samu ti Tata sepelaka ti na kati ya yandi fwana zinga muvimba ya bima nionso;*

118 “Muvimba ya bima nionso.” Muvimba ya Nzambi, muvimba ya Bawanzio, muvimba ya ntangu, muvimba ya Seko; bima nionso vwandaka zinga na Yandi. Yayi kele Muntu yayi.

*Mpe, vwandaka na ngemba na nzila ya menga ya kulunsi ya yandi, na nzila ya yandi samu na kuvutula ngwisani na mambu nionso na yandi mosi; na nzila ya yandi, mu ke tuba, bima nionso kele na ntoto, to bima yina kele na mazulu.*

119 Muntu yayi ya nene yina beto ke na kuzonzila, “Mbandukulu ya luvangulu ya Nzambi.”

120 Ntangu yayi, ntangu yayi ti, Dibuundu, ti lukanu ya Yandi nyonso vwandaka Dibuundu. Ntangu yayi wapi mutindu beto ke kota na kati ya Dibuundu yayi? “Na Mpeve mosi beto nionso me botama kati na Nzutu mosi,” Dibuundu, Nzutu ya Klisto. Yawu lenda kubwa ve.

121 Ntangu yayi, beno tala yina ke salama. Ntangu yayi beno tala mbote yayi, kaka mwa kifwani mosi awa.

122 Ntangu yayi, muntu yayi na ngaanda kele nsuni. Ya kele yina beto ke talaka; yina beto ke mona. Mpe ya kele na bankotolo tanu na nzutu yina. Mpe mwana nionso yina me basika na lukolo ya bana, mutindu munu mosi, me zaba ti ya kele na ba-sens tanu yina ke twadisaka nzutu; kumona, ntomo, kusimba, kuwa nsunga, mpe kuwa. Kukondwa yawu, beno lenda ve kusimba nzutu. Ya kele kaka mutindu yina beno fwana kuzwa na nzutu; kumona, ntomo, kusimba, kuwa nsunga, kuwa; beno me mona yawu, ba ke mekaka ntomo, ba ke simbaka. . . Ntangu yayi, yayi kele yimbi, na ngaanda.

123 Ntangu yayi, na kati ya kele mpeve, yina beno ke kuma ntangu beno me butuka na kati ya ntoto mpe ti mpema ya luzingu me fula na kati ya yandi. Mpeve yina kele na nkadulu ya yinza samu ti ya pesamaka ve na Nzambi, kasi ya me kuzwa (pesama) muswa na Nzambi. Ntangu yayi beno me bakula yawu? Samu ti, konso mwana yina me butuka na yinza, “me butuka na disumu,

me salama na kati ya disumu ya nkú; kwizaka na yinza na kutubaka baluvunu.” Ya kele kieleka? Na yina, muntu yina, na kati kuna, kele nsumuki, na kubanda. Ntangu yayi, kasi . . .

<sup>124</sup> Ntangu yayi, ya kele na bankotolo tanu. Mpe bankotolo yayi tanu . . . Mu zaba ve kana mu lendaka kutanga yawu ntangu yayi. Ntangu . . . Ntete, mu zaba, kele kubanza, konsiansi, mpe zola, kusoola . . . Ve. Konsiansi, zola, kubanza . . . Ya kele na bankotolo tanu ya mpeve. Beno lenda banza ve na nzutu ya beno; beno fwana banza na mpeve ya beno. Beno lenda ve kuvwanda na konsiansi na kati ya nzutu ya beno. Ya kele ve na ba-faculté ya yintu; nzutu ya beno kele ve na yawu, na yina beno fwana banza na mpeve ya beno. Beno fwana kubanza. Beno lenda ve kubanza na nzutu ya beno, samu yina ya kele ve na kumona, ntomo, kusimba, kuwa nsunga, to kuwa. Kubanza kele yina beno lenda sala na mabanza ya beno. Kana beno kele ya kulala to beno kele ya kuvumbuka, nzutu ya beno kele ya kulala kuna ya kufwa, kasi mpeve ya beno lenda dyaka kubanza. Ba-sense tanu ke na kuyala na kati ya muntu. Mpe yina . . .

<sup>125</sup> Ntangu yayi, na muntu ya nsuka, yina kele moyo, ya kele kaka na sense mosi ke yalaka yawu, mpe yina kele kimpwanza . . . kimpwanza na kusoola to kumanga.

<sup>126</sup> Mpe ntangu yayi kikuma yawu yina bantu bubu yayi . . . Ntangu yayi, beno zimbana yayi ve ntangu yayi, mpe beno ke—beno ke mona yina kele Santu . . . yinki kidimbu ya ntete ya Mpeve-Santu kele. Beno me mona?

<sup>127</sup> Ntangu yayi, bantu lenda zinga na kati ya mpeve yayi, mpe bawu ke bina na kimpeve. Bawu ke boka na mpeve. Bawu ke kwendaka na dibuundu na kimpeve, mpe bawu lenda kuzwa Mpeve ya kieleka ya Nzambi yina me pakulama na zulu ya mpeve yina, kasi bawu ke vwanda kaka ya kuzimbana mpe bayina me twadisama kaka na diabulu na mpeve yina.

<sup>128</sup> Samu, beno tala, ya kele samu na yina beno lendaka ve kutuba na kento yina, ti yandi me lwata bakupe, yandi me sala yimbi. Beno lenda ve kutuba na yandi ti kuzenga bansuki ya yandi kele yimbi. “Mbote, yinki bansuki ya beno fwana kusala na yawu?” Mbote, yawu salaka na Samson. Beno me mona?

<sup>129</sup> “Muntu nionso yina ke bwela ndinga mosi na Yayi, to ke katula Ndinga mosi na Yawu.” Beno fwana vwanda na dikunzi kisika mosi kuna.

<sup>130</sup> Ntangu yayi, mumbandu, kana mu vwandaka muntu ya Baptiste, mpe beno ke kwisa kuna mpe beno tuba na munu ti mu fwana—mu fwana baka mbotika na Nkumbu ya Yesu Klisto; ya kele na kati ya Biblia. Mbote, kima ya ntete beno zaba, mu ke tuba, “Mu ke yufula pasteur ya munu.”

<sup>131</sup> Mpe mu ke kwenda na pasteur; yandi ke tuba, “Oh, ya kele kima ya ntangu me luta, beno me mona. Yinga, beno me mona, beto ba-Baptiste, tala yina beto ke kwikilaka; beto ke kwikila

ti beto fwana kota na masa na bisalu ya ‘Tata, Mwana, Mpeve-Santu.’ Ya kele mutindu yina dibuundu nionso me sala yawu. Kubanda Jean Smith bandaka yawu, ba ke salaka yawu mutindu yina.” Mbote, yina kele dikunzi ya beno. “Beto ke kipe ve yina muntu yankaka ke tuba!”

<sup>132</sup> Yinki ke salama kana beno kele Methodiste, mpe kulosila masa kele systeme ya beno, mpe ba me tuba na beno ti beno fwana kota na masa? Beno me mona yina mu zola kutuba? Beno ke vutuka na pasteur ya Methodiste, mpe yandi ke sonika mpe ke yufula évêque, kana *kingandi* me tuba *yayi-mpe-yayi* samu na *yayi*. “Kasi beto, dibuundu ya ba-Methodiste, beto me banda bamvula nkama tatu to yiya me luta, na Angleterre, na nzila ya John Wesley, mpe Whitefield, mpe bayankaka nyonso kuna, mpe Asbury. Beto me sala mukanda yayi, na kulandaka John Wesley, ti ba fwana losila beto masa, samu ya kele kaka emo- . . .nkadulu ya nganda. Mpe beto ke banza ti kulosa masa kele kaka mbote mutindu ya kele mutindu yankaka.” Kana beno kele kieleka. . . Kana dibuundu ya ba-Methodiste kele dikunzi ya beno, beno ke kangama kaka na yawu.

<sup>133</sup> Kana beno kele muntu ya Katolika . . .Mpe mu ke tuba na beno, ya kele ve na kati ya Biblia na kudya ve musuni na Kilumbu ya tanu, bima yayi nionso mutindu yayi, mpe “Eucharistie ya Santu kele ve hostie, samu ya kele Mpeve,” mpe nionso yankaka. Mpe beno ke kwenda na nganga-Nzambi ya beno, nganga-Nzambi ke tuba, “Yawu yayi, ya kele ya kusonika kaka na kati ya mukanda ya beto.” Mpe kana dibuundu kele dikunzi ya beno, beno ke kipe ve yina muntu yankaka me tuba. Yina kele dikunzi ya beno.

<sup>134</sup> O Nzambi, sadisa ti yayi kukota! Samu na munu, kima nionso kele ya yimbi. Ndinga ya Nzambi kele dikunzi. Nionso yina Ndinga ke tuba, yawu yina kele ya kieleka.

<sup>135</sup> Ntangu yayi, kuna na zulu na bitezo yayi, ti beno lenda vwanda ve na kati ya mwa muntu yayi na kati; mpe beno fwana vwanda ya kusoola na ntwala. Samu beno vwandaka na Nzambi, beno kele kitini ya Nzambi.

<sup>136</sup> Mu vwandaka na kati ya tata ya munu. Mu vwandaka mpe na kati ya nkooko ya munu ya bakala, mpe nkooko ya nkooko ya munu ya bakala. Na nzila ya nkuna, mu vwandaka na kati ya yawu.

<sup>137</sup> Mpe mu vwandaka na kati ya Klisto. Beno vwandaka na kati ya Klisto na ntwala ya mbandukulu ya yinza. Yandi kwisaka samu na kuvulusa Bantu ya Yandi, Bantu ya Yandi yina vwandaka na kati ya Yandi. Alleluia! Bana ya Yandi yina vwandaka na kati ya Yandi!

<sup>138</sup> Yandi kwisaka ve samu na—samu na kuvulusa bana ya diabulu. Bawu ke zaba Yawu ata fioti ve. Mpe ba ke na mayele mingi na banzila ya bawu ya luzabu ya bawu ya lukolo, ti beno

lenda ve kufwanikisa na bawu ata fioti. Beno lenda ve kuswaswa na bawu. Kasi, na lukwikilu beno ke mona Yawu.

139 Ntangu yayi, science ke na nsatu ya lukwikilu ve. Science ke siamisa yina ba ke na kutuba. Ya ke na nsatu ya lukwikilu mosi ve.

140 Nganga-Nzambi ya Catholique ke tuba na beno, “Beno tala bantangu yikwa dibuundu ya Catholique me simba mbote. Beno tala bantangu yikwa yandi telemaka na nsi ya balukwamusu ya mimpani.”

Dibuundu ya ba-Méthodiste ke tuba, “Beno tala awa bilumbu yikwa. . .”

141 Mu monaka dibuundu. . .beno tuba na munu nsamunu mosi ya luvunu; mu monaka yawu mazono na nzila, ntangu mu vwandaka kwisa. Yandi tubaka, “Dibuundu ya Klisto, me salama na mvula 33 ya Ntangu ya Beto.” Yawu me lungisa ntete ve bamvula nkama, beno me mona, denomination. Oh, la la! “Malongi ya bantumwa”? Na mpasi ba me kuzwa kima. Ba kele ba-Sadducéen ya kilumbu yayi; ata Mpeve, ve. . .Mpe beno lenda ve kutuba na bawu; beno lenda ve kuzonza na bawu; beno lenda ve kubanza na bawu.

142 Samu, beto ke kwenda ntama na mabanza. “Kuyekama ve na zulu ya mayele ya nge.” Lukwikilu ke banzaka ve na ata fioti. Lukwikilu ke kwikilaka Yawu.

143 Bawu ke tuba, “Ntangu yayi, tala awa, nge ke kwikila ti nge fwana sala bima yayi ba salaka kuna? Ya lendaka salama ve! Yina. . .”

144 Kasi Biblia me tuba mutindu yina. Mu lenda ve kutendula wapi mutindu ya ke salama, kasi yawu ke salama. Nzambi tubaka mutindu yina. Na yina beno lenda ve. . .Mu lenda tuba na beno kima mosi ve samu na yawu. Lukwikilu ke tendula Yawu ve. Beno zaba yawu? Lukwikilu ke kwikilaka Yawu kaka.

145 Yesu tubaka na Nicodeme, na San-. . .kimvuka ya oecumenisme kilumbu ya Yandi; yandi kwisaka na Yandi na mipima, yandi tubaka, “Mulongi, beto zaba ti Nge kele Mulongisi yina me katuka na Nzambi, samu muntu ve lenda sala bima yina Nge ke salaka, kaka kana Nzambi kele na yandi.”

146 Yandi tubaka, “Ya kieleka, Mu ke tuba na nge, ‘Kana muntu me butuka mbala zole ve, yandi lenda mona ve Kimfumu ya Nzambi.’”

147 Yandi tubaka, “Munu, kiboba ya bakala, mu ke kota na kivumu ya mama ya munu, samu na kubutuka?”

148 Yandi tubaka, “Ntangu yayi wapi mutindu mu ke tuba na beno bima ya Mazulu, na yina beno ke kwikila ve na bima ya ntoto?” Beno me mona?

149 Na yina Yandi tubaka, kilumbu mosi, “Kana beno kudia ve nzutu ya Mwana ya Muntu, beno kunwa ve Menga ya Yandi, beno ke na Luzingu ve na kati ya beno.” Yandi tendulaka yawu ve.

150 Bantumwa yina mpe bantu ya kilumbu yina, bayina ba soolaka na Luzingu; Yandi zabaka yawu. Yandi tubaka, “Bayina nionso Tata pesaka Munu ke kwisa. Kima mosi kaka beno lenda sala kele kaka kusala ti Ndinga na Munu kuzabana; bawu zaba yawu, samu mameme ya Munu kuzaba Ndinga ya Munu.” Mpe ndinga kele ndinga yina me tubama. [Kitini ya mpamba na bande—Mu.] “Bawu ke kwikila Yawu, na mutindu nionso. Bawu fwana ve kusiamisa kima mosi na nzila ya science, to ba ke yufula Sadducéen mosi to Pharisien, to kima yankaka, samu na yawu. Mu tubaka yawu, bawu ke kwikila yawu, samu mameme ya Munu ke waka Ndinga ya Munu.”

151 Mpe *Yayi* kele Ndinga ya Nzambi na mutindu ya mukanda, samu ti *Yayi* kele luzayikisu ya muvimba ya Yesu Klisto, Ngwisani ya Ntama mpe ya Malu-malu me vukana kintwadi. Amen. Beno bawu yayi.

152 Samu na yinki? Beno ke tuba, “Bantu yayi kele bantu ya mbote. Yinki ke salaka bawu. . .” Samu, kima mosi, kisika ya bawu ya kukangama kele na dibuundu. Mpe na kati awa. . . Beno ke bambuka moyo na Lumingu me luta, sabala mosi me luta; bantu yikwa vwandaka awa mpe kuwaka dilongi na zulu ya *Bapakulami Na Bilumbu Ya Nsuka?* Mu banza beno nyonso. Beno me mona, ba kele ya kupakulama. Bampeve ya bawu kele ya kupakulama, na kitezo ya zole *yayi*.

153 Ntangu yayi, kento yina ya ntete me tuba. . . Ve, yandi ke kipe ve yina dibuundu me tuba, yina muntu yankaka me tuba. Yandi kele kivadangu ya mayela mingi. Yandi me basika na université. Yandi lenda sala yawu ya kubumbama na bakala ya yandi, mpe kubanza ti yandi kele na mayela mingi na kusalaka yawu.

154 Kento yayi yankaka kele “kinkonga, mpofu, mpe zaba yawu ve.” Oh, ya kele kyadi, kasi ya kele kifwani ya Biblia yina ke talisa beto. Ntangu yayi, yandi ke kwendaka na yinzo-Nzambi. Kento yina, lenda vwanda ya kulutila mbote, kento yina ke vwanda. . . Yandi ke zinga luzingu ya mbote, luzingu ya kuvedila; ya kele na kima mosi ve ya yimbi samu na yawu. Nzambi ke vwanda Zuzi ya yawu. Mu zaba ve; mu kele Zuzi ve.

155 Mu kele kaka. . . na kizitu samu na yina Yandi ke lakisa munu. Ya kele yina bantumwa tubaka. “Beto ke tuba yina beto me zaba, yina beto me kuwa, yina beto me mona.” Yawu yina kaka mu ke na kiyeka ya yawu. Yawu yina kaka beno ke na kiyeka ya yawu.

156 Kasi ntangu yayi, beno me mona, kana beno ke baka kento yina mosi. . . Wapi kisika yandi sukaka? Beno me mona? Yandi me bakula yawu ve. Yandi me kuwa, na ntembe ve; yandi me zibula radio, bambala mingi. Ndinga ya Nzambi vwandaka tuba,



bambala mingi. Mbote, ntangu yayi, beno me mona, yandi me kota na kati ya nsambulu yayi awa, kiziku mosi. Mabuundu nionso kele biziku. Nyonso, ya kele kaka kieleka, ya kele kaka ba-loge kisika bantu ke vukanaka mutindu bamambe. Mpe yandi ke kwenda kuna; mbote, yina ke lunga samu na yandi. Ntangu yayi kana beno kwenda tuba na yandi yina yandi fwana sala, yandi ke kuwa beno ve. Beno ke lakisa yawu na yandi na kati ya Biblia; yandi ke kuwa Yawu ve.

<sup>157</sup> Ntangu yayi, mpangi ya munu ya bakala ya luzolo, mpangi ya kento, kaka milabu mosi to zole dyaka na ntwala ya kumanisa. Ya me bikana baminuti kumi na tanu, ntangu ya kumanisa; minuti kumi na tanu.

<sup>158</sup> Ntangu yayi beno tala, mu zola kuyufula beno kima mosi. Samu na yinki kento yina lenda ve kumona yawu? Samu na yinki yandi lenda ve? Na yina yandi me sala pité na nzutu, na ntwala ya bakala ya yandi, yandi me zaba dyambu ve; yandi kele na kima ve ya kufunguna. Yandi kele ya kuvedila mutindu kilumbu yandi butukaka; muntu mosi ve me simbaka yandi.

<sup>159</sup> Mu ke fwanikisa, kento yayi, na dibuundu. Yandi kele ya kuvedila mutindu yandi butukaka. Mbote, ya kele kieleka yina dibuundu kele, mutindu yandi butukaka, kasi yandi vwandaka “yandi me butuka na disumu, me salama na kati ya disumu ya nkú, kwizaka . . .” Beno me mona yina mu zola kutuba?

<sup>160</sup> Ntangu yayi beno ke tuba na yandi ti ya kele yimbi samu na kuzenga bansuki ya yandi; Biblia ke tuba mutindu yina. Ya kele yimbi samu na yandi na kulwata bakupe; Biblia me tuba mutindu yina. Yandi ke tuba, “Buzoba.” Samu na yinki? Dikunzi ya yandi kele *awa* ve, na kati ya muntu yina ya tatu, moyo yina ba soolaka ntete mpe ba fidisaka na Nzambi. Kasi dikunzi ya yandi kele na kati ya organisation *awa*, ti muntu yayi me sala organisation na ngaanda ya Yayi. Beno me mona?

<sup>161</sup> Kasi kana Ndinga ya Nzambi kele kuna na kati ya moyo yina, ya me tuba, “Amen! Mu me mona yawu.” Ya kele ya kusungama na Yawu. Ntangu yayi beno tala awa. Na yina, muntu yina me butuka na Mpeve ya Nzambi . . .

<sup>162</sup> Beno me mona, *awa* na ngaanda kele nsuni. Mpe mu ke na kutuba na ntwala ya kimvuka ya bakento mpe babakala, mu ke tuba mutindu pasteur ya beno—ya beno, mutindu mpangi ya beno ya bakala. *Awa* kele nsuni, ya kele ya kulemba, ya kele ngolo mingi . . . Mama mosi ya fioti ke tambula na bala-bala; bakala mosi ya ntwenia ya bamvula ya yandi ya buntwenia, ntangu yandi kele na bamvula kumi na sambwadi, kumi na nana, bamvula makumi zole, makumi zole na tanu, makumi tatu, yandi ke belama kuna . . . Mpe mama yayi ya ntwenia ke kwisa, na kuningisaka nzutu nionso, nzutu ya yandi, yandi ke tambula na basapatu ya yinda; ya ke luta na zulu mpe na manima; mpe robe mutindu *yayi* na zulu ya mabolongo ya yandi, to kupe mosi. Beno

zaba ti Biblia ke tuba ti yandi ke sala mutindu yina? Beno zaba, Biblia me tuba ti ya kele mutindu yina yandi ke sala, yandi ke vwanda ya kindumbu mutindu yina.

<sup>163</sup> Beno me tanga yayi awa, *Reader's Digest* ya ngonda yayi, ti, “Babakala mpe bakento ya kilumbu yayi, mwa bana ya bakento, kubanda bamvula makumi zole to makumi zole na tanu, kele na menopause,” ti ntangu yayi ya kele kuvutuka na luzingu ti ya kele mvula ya bukuluntu, ya kele kati-kati ya bamvula makumi zole na makumi na tanu, landila science. Ya vwandaka pene-pene ya bamvula makumi tatu to makumi tatu na tanu, na nsungi ya munu. Na nsungi ya mama ya munu, kento lendaka ata fioti ve kukutana na menopause tii kuna ya ke vwanda na bamvula makumi yiya to makumi yiya na tanu.

<sup>164</sup> Yinki ya kele? Ya kele na nzila ya science, mpe madya, mvukisa, yina me bebisa nzutu nionso ya kimuntu tii kuna beto me kuma nkonga ya—ya—ya kubeba. Mbote, kana nzutu ya muntu kele ya kubeba, ba-cellule ya yintu na nzutu ke vwanda mutindu yina?

<sup>165</sup> Ntangu yayi beno tala Kimpeve, ke na kulandaka yawu. Ntangu mosi ke kwisa, na Nkumbu ya Mfumu, ti bantu ke vwanda ya muvimba bilawu. Biblia me tuba mutindu yina. Ba ke boka mpe ke sala makelele; bima ya nene ya boma na dibanza ya bawu. Ba-radio mpe bima, manaka ya beto ya television, ke na kubasisa yawu. Ya ke vwanda na bima mutindu bifetete yina ke basika na zulu ya ntoto, yina ke vwanda yinda mutindu bayinti kumi na yiya; ya ke vwanda na ndeke ke pumbuka na zulu ya ntoto, na mapapu bakilometele sambanu to nana; mpe bantu ke mona yawu, ba ke dila mpe ke boka, mpe ke dodokila samu na kyadi. Kasi ya ke vwanda Bampasi. Beno vingila tii mu ke longa na Bampasi yina ke zibuka.

<sup>166</sup> Beno tala yina Moise salaka na nzutu, Mpeve ve, ntangu Yandi tubaka, “Moise. . .” Nzambi tubaka na Moise, “Kwenda kuna,” na profete ya Yandi, “baka diboko mosi ya putulu, losa yawu na zulu mpe tuba, ‘MUTINDU ME TUBA MFUMU, banzinzi ke kwiza na zulu ya ntoto.’” Ya vwandaka na banzinzi. Kima ya ntete beno zaba, bawu bandaka na kumona kima mosi ke ningana na zulu ya matiti. Ba talaka kuna, ya kele na kima yankaka. Mpe na manima ya mwa ntangu fioti, ba vwandaka na mudindu mingi ti beno lendaka ve kuluta na kati ya bawu.

<sup>167</sup> Wapi kisika ba me katuka? Nzambi kele Mvangi. Yandi lenda sala yina Yandi zola. Yandi kele na kimpwanza. Yandi lendaka sala ndeke yina kele na mansala yina ke kwenda nsongi na nsongi ya ntoto.

<sup>168</sup> Yandi tubaka, “Bika ti banzinzi kukwisa, ya fuluka na zulu ya ntoto ya muvimba.” Ya vwandaka ve na nzinzi na zulu ya ntoto. Kima ya ntete beno zaba, nzinzi mosi ya bleu bandaka na kupumbuka. Kima ya ntete, ya vwandaka na nana to kumi,

kumi na zole. Kima ya ntete beno zaba, beno lendaka ve kuluta na kati ya bawu. Nzambi, Mvangi, ke zitisaka Ndinga ya Yandi.

<sup>169</sup> Mpe yandi tandaka nkawa ya yandi, na lutumu ya Nzambi, mpe tubaka, “Bika ti bakiula kubasika mpe kufika ntoto.” Mpe bakiula kwisaka tii bawu fulukaka, na yina ba bandaka na kutentika yawu, mpe nsunga ya yimbi vwandaka basika bisika nyonso, mu banza tiya vwandaka na miongo ya bakiula ya ba-metre kumi na kumi na tanu, na yinda. Ba vwandaka na placard ya—ya Pharaon. Ba vwandaka na kati. . . ba vwandaka zangula bulanketi, mpe ya vwandaka na bakiula bankama tanu na nsi ya bulanketi, na nsi ya mbeto, na madia. Bisika nionso bawu vwandaka kwenda, ya vwandaka na bakiula, bakiula, bakiula. Wapi sika yawu me katuka? Nzambi, Mvangi, kele na kimpwanza. Yina Yandi me tuba, Yandi ke sala yawu!

<sup>170</sup> Mpe Yandi tubaka ti ya ke vwanda na bima ya boma ke monana na zulu ya ntoto. “Mampasu vwandaka na bansuki mutindu bakento,” bansuki ya yinda, samu na kuyangisa bakento yina zengaka bansuki ya bawu. “Meno mutindu nkosi; na meno na mikila ya bawu, mutindu bankala-nseke; ba ke yangisa bantu, bangonda mingi.” Beto vingila kaka tii kuna beto ke kuma na kuzibuka ya Bampasi yina mpe Bidimbu, mpe Banzasi Sambwadi, beno tala yina ke salama. Oh, mpangi, beno ke sala mbote na kukwenda na Goshen na yina ntangu kele samu na kukwenda na Goshen. Beno kipe ve mambu yayi ke luta kuna na ngaanda.

<sup>171</sup> Beno tala fioti. Tala mama mosi ya ntwenia ke na kudenda kuna na bala-bala; tala mwana-bakala ya ntwenia ke kwisa kuna, ya ke benda meso ya yandi na zulu ya kento yayi. Yandi kele mambele ya dibuundu. Yandi kele Pentecotiste. Yandi kele nionso yina yandi kele. Kasi kima ya ntete beno zaba, ya kele ve na dikunzi na kati *kuna*. Yandi ke tuba, “Mbote.” Yandi kele na bansuki ya kutengama, mpe mwana-bakala ya ntwenia ya kitoko, na mapeka ya kusungama mbote; mu banza yandi mekaka na kuzinga mbote. Kento ke kwisa na ntwala ya yandi, ya lendaka vwanda longi mosi. Kima ya ntete beno zaba. . .

<sup>172</sup> Yinki ya kele? Yayi *awa*, kele nsatu ya nsuni; mpe mpeve yina me vwanda *awa*, ya kupakulama, ke tuba, “Kusala yawu ve, kusala yawu ve.” Kasi yinki yandi ke sala? Yandi ke sala ve keba na yawu, ba ke kanga yandi na mutambu, yawu yina. Kima ya ntete beno zaba, yandi ke meka na kuwisana kilumbu na yandi. Yandi kele ya kubwa samu na pité, ata ti yandi me simba yandi to ve.

<sup>173</sup> Kasi, mwana ya Nzambi ya kisina, yina me butuka mbala zole! Amen! Beno lenda sala yawu ve. Ya kele ya muvimba yina lendaka ve kusalama samu na bakala yina kele na mavimpi ya mbote na kuluta na ntwala ya kento mutindu yina, kukondwa

kima mosi kusalama. Kasi ntangu Kima mosi kele na kati; mwa Kima yina me butuka mbala ya zole *awa!*

174 Ata ti muntu yina me boka, me zonga na bandinga, me dumuka, me bina, nyonso yankaka, me pakulama na Mpeve; me sala bidimbu nionso mpe mambu ya ngitukulu yina Nzambi tubaka na kati kuna, na nzila ya Mpeve ya Yandi! Yesu tubaka, “Bantu mingi ke kwisa na Munu na kilumbu yina, ke tuba, ‘Mfumu, mu pesaka profesi ve na Nkumbu ya Nge? Mu basisaka ve bampeve ya yimbi na Nkumbu ya Nge? Ve. . .’” Yandi ke tuba, “Kwenda ntama na Munu, nge yina ke salaka disumu ya nkú.” Yinki kele disumu ya nkú? Kima yina beno zaba na kusala, mpe beno ke sala yawu ve. “Kwenda ntama na Munu, nge yina ke salaka disumu ya nkú; Mu zabaka nge ata fioti ve.”

175 Kasi kuna na kati ya muntu yina, kana mwa dikunzi yina kele kuna, Nkuna ya Nzambi yina ba soolaka na ntwala ya mbandukulu ya yinza; Mu ke kipe ve yina ke salama, ya ke simba yandi. Yandi ke bikana kuna.

176 Ya kele samu na yina kento yina ke lwataka bakupe. Ba me baka yandi mutindu kento ya kindumba, kaka mutindu mosi na kento yina ke na kusalaka diambu yango. Beno me mona? Yandi zaba ve mpeve yina. . . Wapi mutindu yandi zaba yawu? Dikunzi ya yandi.

177 Yinki kele dikunzi? Ya kele ndinga ya nsuka. Dikunzi kele amen. Ya kele nsuka ya kunwana nionso, dikunzi ya beno.

178 Mpe kana dibuundu ya beno, dibuundu ya Pentecote, yina ke tuba na beno ti, “Bansuki ya yinda mpe bima ya mutindu yina kele kaka bufanatiki. Ya kele piné ya kieleka ya lusalusu, mwana-bakala yayi ya kitoko,” mpe nionso yina, bima mutindu yayi, bakala yayi ke tuba mutindu yayi kele ya diabulu.

179 Samu ti, Ndinga ya Nzambi ke tuba, “Ya kele nsoni samu na kento na kuzenga bansuki ya yandi. Yandi ke zitisa ve yintu ya yandi.” Kana yandi me kondwa buzitu na bakala ya yandi, mpe bakala ya yandi kele Dibundu, mpe Dibundu kele Klisto, yandi kele kento ya kindumba ya kukondwa luzitu; yandi kele kinkonga mpe yandi zaba yawu ve. Kinkonga! Biblia me tuba ve, “Vwale ya kento kele bansuki ya yandi”? Ba pesaka yandi ve bansuki mutindu vwale?

180 Kilumbu mosi, kuna na Kiti ya Lufundusu! Mu me meka na kusala ti beno kumina Nkisi, mpe mu me simba Yawu, mpe beno me basisa Yawu mbala mosi na kati-kati ya misapi ya beno. Nzambi ke sambisa bawu kilumbu mosi. Ya kele MUTINDU ME TUBA MFUMU. Ya vwanaka ve nkonga ya buzoba, to kiboba mosi ya kilawu na mabanza ya yandi. Ya kele ve. Samu ti, ya kele Ndinga ya Mfumu.

181 Mpe Muklisto ya kieleka, ya kisina ke vwanda ya kusungama na muntu yina na kati, Mpeve yina vwanaka kuna na mbandukulu, yina kele Ndinga.

182 Mutindu Yandi vwandaka muvimba ya beno nionso, beno vwandaka na kati ya Yandi kuna na Calvaire. Yandi zabaka beno ntete ti beno ke vwanda awa. Yandi me talisa kaka yina ke salama. Mpe beno vwandaka na kati ya Yandi; beno kufwaka na Yandi. Beno kufwaka na lunangu ya beno, beno kufwaka na mvwatu ya beno, beno kufwaka na yinza. Ntangu Yandi. . . Beno kufwaka na Yandi na Calvaire, mpe beno vumbukaka na Yandi ntangu Yandi vumbukaka diaka na lufwa na kilumbu ya tatu. Mpe samu beno me ndima yawu, ntangu yayi beno me vwanda na bisika ya Mazulu kati na Klisto Yesu. Alleluia!

183 Yawu yina. Yawu kele muntu yina ya kati. Ya kele kati yina ke ndimaka Ndinga, ke kangamaka na Ndinga, kukonda kutala. Yawu kele kulutula beno. Mu longokaka yawu, bamvula mingi me luta.

184 Bébé ya munu vwandaka kuna, ke na kufwa. Kento ya munu vwandaka kuna. . . na—na yinzo ya madidi ya bamvumbi, ambome mpe ya kuyidika. Ba bokilaka munu kuna, mpe Sharon vwanda kufwa. Yina kele mpukumunu ya ngolo mingi yina mu me monaka ntete ve na luzingu ya munu. Mu vwandaka pene ya bamvula makumi zole na tanu. Mu kwendaka kuna, mpe Billy Paul vwanda pene ya kufwa.

185 Docteur Sam kwisaka, yandi tubaka, “Bill, mu banza ve kana beto ke lenda na kuvuukisa Billy. Mpe munu. . .” Yandi tubaka, “Yandi kele mbote mingi ve.” Yandi tubaka, “Bill, mu ke na mawa mingi samu na nge.” Yandi tulaka maboko ya yandi na zulu ya munu.

Mu tubaka, “Doc, mu ke na ngolo diaka ve.”

186 Mwa bangunga, mu bokilaka yandi, bébé ya munu, Sharon, mu me basisa yandi kuna, yandi. . . samu na kutala yandi na spasme; ya lenda kusuka ve. Ba tulaka ntunga na colonne ya yandi; ba kotisaka yawu, ba me fiongonina yawu, meningite ya tuberculose. Yawu yina.

187 Mu kwendaka tii na lupitalu; mu telemisaka tomabilu ya munu ya ntama kuna, mpe kulumukaka mpe bandaka na kukwenda na kivinga. Awa kwizaka Sam na couloir, na yimpu ya yandi na diboko ya yandi, yandi vwandaka dila, yandi tulaka diboko ya yandi na zulu ya munu, yandi tubaka, “Kwisa, Bill.”

Mu tubaka, “Wapi dyambu?”

Yandi tubaka, “Nge ke mona yandi ve.” Yandi tubaka, “Yandi ke na kufwa, Bill.”

Mpe mu tubaka, “Ve, Sam, bébé ya munu ve.”

188 Yandi tubaka, “Yinga.” Yandi tubaka, “Kulomba yandi ve, Bill. Kana yandi ke zinga,” yandi tubaka, “yandi ke vwanda na mpasi.” Yandi tubaka, “Yandi ke sala kisalu ve, mpe yandi ke vwanda na bampasi luzingu ya yandi nionso.” Yandi tubaka,

“Yandi kele na méningite.” Yandi tubaka, “Kukwenda ve pene-pene ya yandi; nge—nge ke kufwa Billy kana nge sala yawu.”

Mu tubaka, “Sam, mu fwana mona yandi.”

<sup>189</sup> Yandi tubaka, “Nge lenda sala yawu ve, Bill. Mu—mu ke yimina nge. Ntangu yayi, nge zaba mutindu mu ke banza na nge, mpe nge kele nkundi ya munu mpe nyonso,” yandi tubaka, “mbala yikwa mu ke banza na nge,” yandi tubaka, “mpe mutindu mu ke kwikila na nge, Bill,” yandi tubaka, “kasi kukwenda ve—kukwenda ve kutala bébé yina.” Yandi tubaka, “Kana nge sala yawu, . . . Méningite kele na zulu ya yandi.” Beno me mona? Yandi tubaka, “Yandi ke kwenda na mwa ntangu fioti, diaka,” yandi tubaka, “nge lenda . . . beto ke zika yandi.” Yandi tubaka, “Bill, mu ke na kiadi samu na nge.”

<sup>190</sup> Mpe yandi bokilaka, yandi tubaka, yandi bokilaka infirmière, samu na kunatila munu nkisi mosi. Yandi tubaka, “Mu zaba ve wapi mutindu bakala yina kele ya kutelama kuna.”

<sup>191</sup> Mu telemaka kuna mwa fioti. Yandi nataka nkisi. Mu vwandaka kuna, na couloir. Yandi tubaka, “Vwanda.” Mpe infirmiere nataka yawu, yandi tubaka, “Nwa yayi, Mpangi Branham.”

<sup>192</sup> Mu tubaka, “Matondo na nge. Vwanda kaka kuna minuti.” Ntangu yandi kwendaka, mu tulaka yawu na crachoir; mu tululaka dikopa.

<sup>193</sup> Mu vwandaka kuna. Mu banzaka, “O Nzambi, yinki mu me sala? Nge ke Nzambi ya mbote. Samu na yinki Nge me bika yandi kufwa, kilumbu yina, ntangu mu simbaka maboko ya yandi zole ya fioti mutindu yayi?” Mu vwandaka bondila Yandi samu na yandi. “Samu na yinki Nge me bika yandi kwenda? Billy kele ya kulala kuna, yandi ke na kufwa; mpe yandi yayi awa, yandi ke na kufwa. Yinki mu me sala? Tuba na munu! Mbote, mu ke sala mbote na kukwenda na bawu.”

<sup>194</sup> Mu zibulaka kielo, mpe ata infirmière ve vwandaka kuna. Mu me syelumuka na kati ya yinzo. Ya vwandaka na ntwala ba yidika lupitalu. Bamusitikele, ya vwandaka kaka ve, na bamusitikele na banela, mpe banzinzi vwandaka kubwa na zulu ya mwa meso ya yandi. Ba tulaka yandi mwa kitini ya mousseline ya musitikele, beto ke bokilaka yawu, kiyungulu ya lele na zulu ya kizizi ya yandi. Mu basisaka banzinzi kuna; yandi vwandaka ya kulala kuna. Mwa meso ya yandi, mutindu yandi monaka mpasi mingi ti meso ya yandi kumaka lubungi.

<sup>195</sup> Na yina Satana kwendaka na lweka ya munu kuna, mpe tubaka, “Nge tubaka ti Yandi vwandaka Nzambi ya mbote?”

Mu tubaka, “Yinga, mu tubaka yawu.”

<sup>196</sup> “Nge tubaka ti Yandi vwandaka Munganga? Mbote, samu na yinki tata ya nge me kufwa na maboko ya nge kuna, mpe ntangu nge vwandaka sambila, yandi vwandaka nsumuki, nge

vwandaka sambila samu yandi kuzwa luzingu? Samu na yinki mpangi ya nge ya bakala me kufwa na maboko ya mpangi ya nge ya bakala yankaka, kuna, mpe nge vwandaka ya kutelema kuna na chaire ya malongi, mwa basabala me luta?” Yandi tubaka, “Na yina samu na yinki Yandi pesaka nge mvutu ve? Nge tubaka ti Yandi ke zolaka nge mpe me vulusa nge.”

<sup>197</sup> Yandi zolaka tuba na munu ve ti Nzambi vwandaka ve, samu ti mu monaka Yandi dezia. Kasi yandi vwandaka tuba na munu ti Yandi vwandaka kipe munu ve.

<sup>198</sup> Yandi tubaka, “Tala kento ya nge. Ba-bébé ya nge ke vwanda kuna ntama mingi ve. Ba me zika papa ya nge. Ba me zika mpangi ya nge ya bakala. Mpe kento ya nge ke zikama ntangu yayi, mbasi. Mpe awa kele bébé ya nge yankaka, yina ke na kufwa. Yandi kele Nzambi ya mbote? Huh? Yandi kele Munganga?” Yandi tubaka, “Nge me kuzwa nsoni!”

<sup>199</sup> Yinki ya salaka? Kubanda . . . ya vwandaka sala na ngaanda, ntangu yayi, na muntu yayi ya ntete.

<sup>200</sup> Yandi tubaka, “Ntangu yayi beno tala. Nge zaba, ntangu nge vwandaka na bamvula fyoti me luta, pene ya bamvula zole to tatu me luta, ntete beno me ndima Yayi, nge vwandaka na mabanza ya mbote na kati ya bantu. Nge zingaka luzingu ya mbote, ya kuvedila. Konso mwana ya kento na mbanza, yina vwanda zola kubasika, kubasika na nge, samu ti bawu vwandaka tala ya kutsyema mpe ya buzitu.” Mu lendaka telama na ntuala ya mosi ya bawu. Mu me fingaka ata mosi ve, mu me tubaka ntete kima mosi ve. Kana yandi me banda kusala mambu ya yimbi, mu vwandaka vutula yandi na yinzo ya yandi. “Mpe ba zolaka nge na kati ya bantu. Kasi yinki nge kele ntangu yayi? Fanatiki ya nsambulu.”

<sup>201</sup> “Ya kele kieleka. Mu vwandaka.” Beno me mona mutindu bima yayi vwandaka tambula kintwadi? Na ngaanda, kubanza na kati ya mpeve, kusala mambu yayi kintwadi. “Ya kieleka, Satana.”

“Mpe nge me tuba ti Yandi vwandaka Munganga?”

“Yinga. Hum. Yinga.”

<sup>202</sup> “Mpe nge ke bondila mpe ke dila, mpe bantu ke tuba na nge ti ya vwandaka ve mutindu yina, ti nge vwandaka landa nzila ya yimbi. Dibuundu ya nge mosi me losa nge, samu na Yayi. Dibuundu ya nge mosi ya ba-Baptiste kuna, me basisa nge na nganda, samu na dyambu ya mutindu mosi.”

“Yinga.”

<sup>203</sup> “Ba me zika papa ya nge. Ba me zika mpangi ya nge ya bakala. Kento ya nge kele ya kulala kuna, samu ba zika yandi. Awa kele bébé ya nge, kaka pene ya baminuti kumi na tanu dyaka mpe yandi ke kufwa. Mpe Yandi kele Munganga? Nsuni ya nge mpe menga ya nge; Ndinga mosi na Yandi ke vulusa luzingu ya

bébé ya nge. ‘Yandi kele Munganga,’ nge tubaka. Bantu mekaka na kutuba na nge. Mulongi tubaka na nge ti nge vwandaka ya kuvwalangana ya muvimba; nge vwandaka ya muvimba kilawu; nge me kuma fanatiki ya nsambulu. Mpe nge tubaka ti Yandi zola nge. Yandi ke zolaka nge?

<sup>204</sup> “Mpe wapi mutindu nge dilaka samu na papa ya nge! Wapi mutindu, nkokila na manima ya nkokila, nge mangaka madia, mpe ntangu nge. . . na kilumbu, ya vwandaka lomba ti nge sambila, samu na kukuma na dikunzi mosi, samu na kusala kisalu. Mpe ntangu Yandi bikaka yandi kufwa na maboko ya nge, nsumuki.

<sup>205</sup> “Kento ya nge, yandi vwandaka kento mosi ya mbote, mpe wapi mutindu nge zolaka yandi!” Mama ya Billy; mingi na kati ya beno ke bambuka moyo na Hope. “Mutindu yandi vwandaka mwana-kento ya mbote! Mutindu nge vwandaka na kiese, na mwa yinzo ya nge kuna; na ba-dollar pene ya sambwadi to nana ya bima ya yinzo, yina bima ya yinzo nge vwandaka na yawu, kasi nge zolaka yandi; mpe nge. . . mpe beno zolasanaka mosi na yankaka. Mpe nge kwendaka mpe sambilaka samu na bantu yankaka; mpe, na nzila ya emotion ya yintu, bawu vwandaka telama mpe vwandaka kwenda mpe tubaka ti bawu vwandaka mbote. Kasi ntangu yayi kento ya nge mosi; mpe yandi yayi, ya kufwa, bilumbu zole ntangu yayi, yandi me lala kuna na kisika ya entrepreneur ya bamvumbi kuna, Scott mpe Combs. Yandi kele Munganga? Huh?”

<sup>206</sup> “Mpe mwa mwana ya nge ya bakala ke na kufwa, Billy Paul, na bangonda kumi na nana. Mpe mwa mwana ya nge ya kento, na bangonda nana, kele ya kulala kuna, yandi ke na kufwa, na méningite. Mpe nge sambilaka; mpe Nzambi me kulumusa barido, mpe tubaka, ‘Kanga yinwa!’ Mu ke kuwa ve, Mu ke kuwa nge ve, ata fioti! Yandi me pesa nge mukongo. Yandi kele Nzambi ya mbote? Huh? Yandi zola nge? Mpe mwana-kento nionso nge me basikaka na yandi, mwana-bakala nionso nge me vukanaka na yandi, bankundi ya nge ya ngolo, ba me kwenda ntama na nge mutindu musambidi ya fanatiki.”

<sup>207</sup> Nyonso yina yandi vwandaka tuba na munu vwandaka kieleka. Nyonso yina yandi zolaka tuba, vwandaka kaka ya kusungama, beno me mona, *awa*. Mu vwandaka kaka ya kukubama na kutuba, “Na yina munu, kana ya kele mutindu yina Yandi fwana sala, na yina mu ke sadila Yandi ve.”

<sup>208</sup> Kaka mutindu mu vwandaka tuba yawu, Kima mosi katukaka kisika yankaka, kuna na kati. Yandi tubaka, “Nani nge kele, ntete? Mfumu me pesa, mpe Mfumu me botula.” Beno me mona, yawu yina muntu yina ya kati, ke banzaka ata fioti ve.

<sup>209</sup> Mu talaka na manima, mpe mu banzaka, “Wapi mutindu mu me kuma na zulu ya ntoto? Mu me basika na nkonga ya bantu ya kulawuka malafu. Wapi mutindu mu me kuma awa? Nani pesaka



munu luzingu? Nani pesaka munu kento yina? Nani pesaka munu bébé yina? Wapi kisika kento ya munu katukaka? Wapi kisika luzingu ya munu katukaka?” Mu tubaka, “Ata ti Yandi me kufwa munu, kasi mu ke tula kivuvu na Yandi.”

Mu tubaka, “Kwenda ntama na munu, Satana!”

<sup>210</sup> Mu tulaka diboko ya munu na zulu ya bébé. Mu tubaka, “Sharon, cherie, mu ke tulula nge na zulu ya maboko ya mama ya nge na mwa minuti fioti, ntangu Bawanzio ya Nzambi ke kubaka beno, kasi kilumbu mosi papa ke mona beno diaka. Mu zaba ve wapi mutindu ya ke vwanda, cherie. Mu lenda ve kutuba na nge wapi mutindu; ntangu Yandi me balula mukongo ya Yandi na munu, Yandi ke kuwa munu dyaka ve samu na nge.”

<sup>211</sup> Yandi bikaka ti kento ya munu kufwa, mpe mu simbaka yandi na maboko, na kudilaka samu na yandi. Mpe papa ya munu, na maboko ya yandi, kufwaka na zulu ya diboko yayi *awa*; yandi talaka munu, yandi mekaka na kubaka mpema ya yandi. Mpe mu sambilaka na ngolo nionso. Wapi mutindu mu lendaka kutana diaka na bantu nionso, samu na kulonga kubeluka ya Kinzambi? Wapi mutindu mu lendaka longi ti Yandi vwandaka Nzambi ya mbote, mpe bika papa ya munu kufwa, nsumuki? Wapi mutindu mu lendaka longi yawu? Mu zaba ve, kasi mu zaba ti Yandi kele ya kusungama.

<sup>212</sup> Ndinga ya Nzambi ke kubwaka ata fioti ve. Ya ke nungaka, ata nionso yina ya kele. Na yina mu zabaka ti ya vwandaka na Kima mosi na kati ya mabanza nionso, Kima mosi na kati ya ba-émotion nionso, bima nionso yankaka mutindu yina. Ya vwandaka na Muntu yina ya kati yina simbaka mbote na ngunga yina. Kima yankaka ve lendaka sala yawu; mabanza nionso, bima nionso lendaka talisama, bima nionso lendaka talisa ti Yawu vwandaka luvunu, mpe mu vwandaka na kifw. Kasi Ndinga ya Nzambi, yina ba soolaka na ntwala ya mbandukulu ya yinza, simbaka kuna na kati.

<sup>213</sup> Mu kuwaka mwa Mupepe kukwiza na kati ya kivinga. Mpeve ya yandi kwendaka kutana na Nzambi.

<sup>214</sup> Mpangi-bakala, mpangi-kento, bika mu tuba na nge, Yina kele kaka kima mosi. Kumeka ve na kubanza na Yawu. Beno meka ve na kuvwanda na bansuki ya yinda samu ti mu me tuba mutindu yina. Beno meka ve na kusala bima yayi kaka, samu ti, ya kele na nzutu ya beno. Beno meka kusala yawu ve, kaka samu na kuvwanda mbote na bantu. Kasi beno vingila kaka na ntwala ya Mfumu, tii kuna Kima mosi na mudindu na kati kuna!

<sup>215</sup> Mingi ya beno ke banzaka, samu ti beno kele na bansuki ya yinda, yina zola kutuba ti beno ke kwenda na Mazulu. Yina zola tuba ve mutindu yina. Mingi ya bawu ke banzaka, samu ti beno kele kento ya mbote, ya buzitu, beno ke . . . ? . . . Yina zola tuba ve mutindu yina. Mingi na kati ya bawu ke banzaka, samu mabuundu ya bawu, ke vwandaka na kati *yayi*, na kimvuka *yayi*

ya nene, mpe badokotolo ya nene ya Théologie. Yina zola tuba ve mutindu yina. Beno me mona?

<sup>216</sup> Mingi ke banzaka, samu ti bawu ke zonzaka na bandinga, bawu ke na Mpeve-Santu. Yina zola tuba ve mutindu yina. Ata ti, Mpeve-Santu ke zonzaka na bandinga. Kasi tii kuna Mpeve-Santu yina ya kieleka, ya kisina ke vwanda ya kusungama na Ndinga nionso! Kana Mpeve-Santu yina na kati ya beno, yina ke sala ti beno kutuba na bandinga, ya ke tala na manima kuna mpe ke wisana ve na Ndinga nionso, na yina ya kele mpeve ya yimbi. Beno me mona?

<sup>217</sup> Ya fwana katuka na kati, yina kele Ndinga, kubanda mbandukulu. “Na mbandukulu ya luvangulu ya Nzambi,” ntangu Nzambi bandaka na kuvanga, kunata beno na luzungu, beno me mona. Beno bandaka kuna na manima mutindu nkuna, mpe beno me kulumuka tii na kisika yina beno ke na ntangu yayi. Mpe, na yina, beno nionso vwandaka kati na Klisto. Mpe na yina ntangu Klisto kufwaka, Yandi kufwaka samu na kuvulusa beno nionso. Mpe beno kele kitini ya Ndinga *yayi*, mpe wapi mutindu lenda. . . Biblia, nyonso ya Yawu! “Musiku na zulu ya musiku, ndongosolo na zulu ya ndongosolo; fioti awa, fioti kuna.” “Ata ditono to kitini ya kisono ke kubwa ve.” Wapi mutindu na yinza beno lenda, na kuvwandaka kitini ya Ndinga yina, beno wisana ve na ndambu ya Yawu yankaka, to kitini nionso ya Yawu?

<sup>218</sup> Nzambi sakumuna beno. Mu me lutisa ngunga ntangu yayi. Mu zolaka sala yayi ve, kukanga beno ntangu ya yinda. Mu ke na kiadi ti mu me kanga beno ntangu ya yinda; mu ke na kiadi ve samu na yina mu me tuba.

Beto me kuma na nsuka ya kima mosi, bankundi.

<sup>219</sup> Beno nionso awa, mu banza, kele kaka bamambele ya dibuundu yayi awa. Mu ke vwandaka awa, ntangu nionso, samu na kuzaba bayina kele bamambele awa. Mu banza ti beno nionso kele bantu yina ke kwisaka ntangu nionso awa. Beno bika mu tuba na beno kima yina kusalamaka. Beno zola, beto tuba, kupesa munu diaka baminuti sambanu? [Dibuundu me tuba, “Amen.”—Mu.]

<sup>220</sup> Ya kele Révérend Tata O. Walker awa na Oregon, yina vwandaka awa Lumingu yina—yina mu vwandaka awa? Muntu nyonso zaba yawu? Ya vwandaka kima ya nene, ya ngitukulu.

<sup>221</sup> Mu me kwisa awa, ya vwandaka na bantu mingi awa, mu—mu vwandaka. . . mu zolaka solula na bantu mingi, mpe mosi na mosi ya bawu vwandaka ya kulunga; mwana ya bawu ya bakala, bana, ya kukwelana, ya kulawuka malafu, mpe—mpe bima ya mutindu na mutindu, mpe kaka bima yina vwandaka ya kulunga. Mu zolaka mona mosi na mosi ya bawu. Mu vwanda lenda ve kusala nionso yina. Mpe mu ke pesa beno na Nzambi, mpe ke tentika maboko ya munu na zulu ya bawu, na kisambu.

Mu tubaka, “O Nzambi, mu—mu lenda sala yawu ve. Kwenda na bawu, Mfumu, sala. . . Nge zaba mutindu ya kusala yawu. Mu ke sambilaka samu na mosi na mosi.”

<sup>222</sup> Billy bokilaka munu. Mpe mu kumaka kaka kuna na Mpangi Banks. Yandi tubaka, “Papa, kana nge. . .”

<sup>223</sup> Mpe, beno kuwa, bantangu yankaka bantu ke lutaka kuna na ditoma, kuna na bala-bala, mpe ba ke talaka na yinzo. Mpe mu ke tala bawu, na yina mu ke pepa bawu mutindu *yayi*, mpe bawu—bawu ke balula yintu ya bawu. Mu zola ve ti beno kusala mutindu yina.

<sup>224</sup> Kilumbu yankaka yina ntangu ba vwandaka sumba yinzo yina kuna samu na munu na kukwenda kuzinga na Tucson, Mpangi Tony vwandaka na yinzo yina yandi vwandaka zola kusumba samu na munu, yina vwandaka ntalu mingi bambala tatu to yiya kulutila kisika yayi. Yandi zolaka mpe kutula ba-dollars mafunda mingi na zulu ya yawu, yandi mosi. Kasi mutindu mosi kaka beno ke kota kuna, mukengi mosi vwandaka kuna. Ya nene. . . Mbote, ya kele kima yina ba me yika kuna. Kasi konso. . . Bantu yayi ke zingaka kuna, beno fwana kuzwa muswa yina ba me sonika, na yina mukengi yayi ke bokila beno mpe ke tala kana ya kele mbote samu na bawu na kukota.

<sup>225</sup> Mu tubaka, “Nge lenda banza, munu, bampangi ya munu ya babakala mpe bampangi ya bakento yina ke kwizaka kutala munu, yina zola kupesa munu mbote mpe kulomba balusakumunu ya Nzambi samu na munu, nge lenda banza ti mu ke vwanda na kati kuna, Tony?”

Yandi tubaka, “Mbote, nge me. . .”

<sup>226</sup> Mu tubaka, “Tony, mutindu dibuundu mpe bawu nyonso ke sala bika ti ya vwanda na kitamina kati-kati ya munu na bantu,” mu tubaka, “ya kele samu na bantu yina ke zola tuba na munu yina mu fwana sala.”

<sup>227</sup> Bawu, bawu ke tubaka, “Mbote, Mfumu me tuba na munu. Alleluia! Mu ke vwanda awa. Nkembo na Nzambi! Mfumu me tuba na munu ti nge fwana sala lukutakanu mosi awa na kati ya kimvuka ya beto. Yinga, tata, nkembo na Nzambi! Nzambi me tuba na munu mutindu yina. Kana beno sala yawu ve, Mpangi Branham, nge kele kieleka retrograde.” Mu ke vwanda kuna ke meka na kulonguka, beno me mona. Yawu yina, beno me mona. Mpe ba ke pekisa bantu mingi ya mbote, na kukota, samu na yina.

<sup>228</sup> Kaka mutindu muntu yina ke kwendaka kuzomba awa na ferme. Fermier ke tuba, “Beno kwiza. Beno lenda kuzomba.” Mpe beno ke kwenda kuna mpe beno ke bula mosi ya bangombe ya yandi; kalumbu ke kwenda mbangu na yisi ya ngombe, mpe beno ke bula kaka kalumbu, na mutindu nyonso. Beno ke diata lupangu, na kisika ya kukwenda na dikunzi mpe kumata kuna mutindu muntu ya buzitu zolaka sala; beto ke mata na lupangu

mpe ke buka yawu mutindu yina. Beno me mona? Na manima yandi ke tuba, “Mu ke pekisa na kukota!” Mu—mu ke nganina yandi ata fioti ve, ata fioti ve. Mbote, yinki yandi ke sala? Yandi ke pekisaka muzombi ya kieleka na kuluta. Ya ke vwandaka ntangu nionso mutindu yina. Ya kele mpeve ya yimbi yina ke pekisaka mbote na kuzwa kisika ya ntete. Ntangu nyonso.

<sup>229</sup> Ntangu yayi, kasi bantu yina kele, mafunda kele kieleka na nsatu mpe bantu ya mbote, bantu ya kifuluka na zola, ya kifuluka na lemvo ya Nzambi.

<sup>230</sup> Ntangu yayi yawu yina ke salama awa ti bantu kukwiza mutindu yina. Beto ve, beto zola yawu ve, ve.

Kasi muntu yayi kwizaka . . .

<sup>231</sup> Billy tubaka, “Kulumuka ntangu yayi, na nswalu, papa.” Yandi tubaka, “Mama Waldrop kele na nsi awa na bantu yina ke na kufwa; nge fwana mona bawu kaka na ntangu yayi.” Mpe mu kwendaka mbangu; mu kulumukaka kuna.

<sup>232</sup> Mpe na manima ya kuvutuka, bawu tubaka, “Ya kele kaka na muntu mosi awa yina kele ya kulala kuna na lweka, kuna, na zulu ya coussin konso kilumbu, na lweka ya kivinga.” Yandi tubaka, “Yandi zola ti nge sambila samu na yandi.”

Mu tubaka, “Mbote mingi.” Yandi tubaka, “Mu ke kotisa yandi.” Mu kwisaka.

<sup>233</sup> Ya vwandaka, mu banza, Cadillac mosi vwandaka kuna na manima, to mutindu ya ditoma mosi ya nene. Mu kumaka, ya vwandaka . . . Mpe bakala yina tubaka, “Mbote na nge.” Yandi zabaka munu ve.

<sup>234</sup> Mpe mu kotaka. Mpe Mpangi-kento Waldrop, ya mputu, yandi kotaka. Beno zaba, yandi vwandaka . . .

<sup>235</sup> Beno zaba disolo ya yandi, mutindu yina ve? Beno me mona, yandi vwandaka na cancer; yandi kufwaka na ndonga ya bisambu, pene ya ngunga mosi na ntwala mu kuma na yandi. Dokotolo ya yandi kwisaka, yandi talisaka . . . Ya me luta bamvula kumi na nana, cancer na kati ya ntima, beno me mona, mpe yandi ke na kuzinga bubu yayi. Mpe yandi ke na kuzinga kuna na Arkansas ntangu yayi.

<sup>236</sup> Mpe yandi vwandaka na Phoenix, na ntangu yina. Mpe yandi tubaka, “Mpangi Willie, mu vwanda yinaka kukwiza mutindu yayi, kasi,” yandi tubaka, “Mu vwandaka ve na kisika ya kuvwanda. Bawu zolaka . . . Bawu tubaka ti pa- . . . kento yayi ke kufwa. Oh, Mpangi Willie!”

<sup>237</sup> Yandi tubaka, “Mu vwanda zola kunata nge mwa dikabu na diboko ya munu, Mpangi Willie,” yandi tubaka, “kasi mu lendaka sala yawu ve. Kasi mu me sala jus ya mûres.”

<sup>238</sup> Oh, ntangu mu kwendaka kuna mpe monaka mwa makopa yayi ya jus yandi tululaka kuna, mu . . . ya monanaka ya busantu

mingi samu na munu na kudia. Beno me mona? Mwa kento yina ya luzolo, ya bamvula makumi sambwadi. Mu tubaka, “Mpangi-kento Hattie. . .” Mu—mu lendaka tuba ve. Ve. Yesu monaka mufwidi ya kento yina tulaka mwa ba-centime tatu, mpe Yandi—Yandi—Yandi bikaka yandi. Beno me mona? Ve. Nzambi ke futa yandi samu na yawu. Yinga.

<sup>239</sup> Mpe na yina Mfumu belulaka kento yango, belulaka nyonso yina vwandaka na yandi, yandi talisaka na pasteur ya yandi, kento yina, yina vwandaka na mabanza ya yandi, yina yandi lendaka sala, kima yankaka. Mpe, oh, bawu nyonso basikaka, na kuboka.

<sup>240</sup> Na yina Billy kwendaka na nswalu. Yandi tubaka, “Papa, muntu yina me kwenda. Mu lenda ve. . .”

Mu tubaka, “Nani kele kuna na kati ya ditoma?”

<sup>241</sup> “Oh,” yandi tubaka, “mwana-bakala mosi katukaka kuna na Oregon, yandi tubaka ti yandi kele na mwa ndosi mosi. Mpe mu tubaka na yandi, ‘Mu ke pesa nge ve kivuvu ya luvunu. Ya kele na bankama tatu awa, yina ke na kuingila ntangu yayi.’” Mpe yandi tubaka, “Mpe mu tubaka na yandi, ‘Sonika ndosi na papier.’ Yandi tubaka, ‘Mu ke na kikunku ya yawu na kati awa, yinda mutindu *yayi*, na mutindu nyonso, mpe mu ke bwela kaka yawu.’”

Mu tubaka, “Kotisa yandi. Pesa yandi bamuniti tanu.”

<sup>242</sup> Mbote, kaka ntangu bakala yayi kotaka, baminuti tanu? Yandi tubaka, “Mu kele Révérend Walker,” mu banza ti nkumbu ya yandi vwandaka, “na Oregon.” Mu banza ti yandi vwandaka mosi ya ba-denomination yankaka, mu zaba ve, Presbyterien, Presbyterien kima mosi.

<sup>243</sup> Yandi tubaka, “Mu me kutana na nge pene ya bamvula makumi zole me luta. Mu kulumukaka na Grants Pass kisika nge. . .” Grants Pass ve, kasi mu me zimbana nkumbu ya kisika yango. “Kuna,” yandi tubaka, “yinsi ya muvimba, ya vwandaka bisono ya nene na bazulunale ya basuka nionso.” Yandi tubaka, “Bantu nionso zabaka yawu.” Yandi tubaka, “Mu lendaka ve kukota na kivinga kisika nge vwandaka, kasi mu monaka nge kukota. Mpe kilumbu mosi, na bala-bala, mu kwisaka na ntuala ya nge,” yandi tubaka, “babakala yiya to tanu vwandaka pene-pene ya nge, mpe mu pesaka nge mbote. Mpe nge. . . Mu tubaka na nge ti mu vwandaka Mpangi Walker, mpe nge tubaka na munu nani nge vwandaka.” Yandi tubaka, “Beto solulaka mwa fioti, mpe na manima bantu tatu to yiya ya nene pusaka nge.” Yandi tubaka, “Mu vwandaka ve na kati ya bantu yina vwandaka sawula nge, mpe mu vwandaka ve samu na nge.” Yandi tubaka, “Mu vwandaka bakula ve.”

<sup>244</sup> Yandi tubaka, “Yawu lutaka diaka bamvula fioti, mpe na manima ya mwa ntangu fioti,” yandi tubaka, “Mu. . .bakala mosi tubaka na munu na kukwisa kuwa mwa ba-bande, pene

ya bamvula tatu me luta.” Mpe yandi tubaka, “Bakala yayi vwandaka tula ba-bande. Mpe, na ntangu yandi salaka mutindu yina,” yandi tubaka, “Mu kuwaka yandi kutuba.” Mpe yandi tubaka, “Bakala yayi vwandaka kwikila ti nge kele profete. Mu tubaka, mu tubaka na bakala yina, ‘Mu zaba ve mambu yina; ya lendaka vwanda, samu na nionso yina mu zaba.’”

245 Na yina, yandi tubaka, “Na yina bakala yankaka kwisaka na mbanza ya beto, yandi vwandaka na lukutakanu, mpe mu kutanaka na yandi. Mpe yandi tubaka, ‘Mu kele profete ya Nzambi samu na bubu yayi.’”

246 Yandi tubaka, “‘Beno kele bantu yikwa kuna, na mutindu nionso?’ Yandi tubaka, ‘Mu—mu—mu me kuwa kisika mosi kuna bakala yina ke kuwaka ba-bande, yandi tubaka, “William Branham, kuna na este, kele profete ya kilumbu,” mpe bima ya mutindu yina.’”

247 Yandi tubaka, “Bakala yayi. . .” Mu ke bokila nkumbu ya yandi ve, samu ya ke wakana mbote ve, awa, beno me mona. “Mpe yandi tubaka, ‘Mu zaba William Branham,’ yandi tubaka, ‘kasi Malongi ya yandi kele nionso ya luvunu.’ Yandi tubaka, ‘Yandi kele ve Pentecotiste; yandi ke kwikilaka ve na nzikisa ya kieleka.’ Mpe yandi tubaka, ‘Kima yankaka, yandi ke tuba kele ti ya kele na ba-profete ya nene mpe ya fioti. Ya kele ve na kima ya mutindu yina.’ Yandi tubaka, ‘Nge kele profete to profete ve, yimeni.’”

248 Yandi tubaka, “‘Mbote, tata, mu kele. . . mu ke swana ve na nge samu na yawu. Mu tubaka ti mu kuwaka muntu yayi kutuba ti muntu yayi, William Branham. . . mpe muntu yayi tubaka ti yandi kele profete.’” Yandi tubaka, “‘Mu vwandaka kukiyufula yikwa bawu kele.’”

249 “Yandi tubaka, ‘Kasi mu zola ti nge zaba yayi. Mu kele profete ya nsungi yayi.’”

250 Yandi tubaka, “‘Mbote, nge kele?’” Yandi tubaka, “‘Mfumu kusakumuna nge mpe kuvwanda na nge.’”

251 Yandi kwendaka na ntwala, yandi ke kipe yawu ata fioti diaka ve. Mpe yandi tubaka ti yandi bandaka, na kusala bandandani tatu to yiya ya balukutakanu, na kati ya bampangi ya yandi. Mpe yandi kwendaka kuna na poste, yandi tubaka, “Beno landisa ve—beno landisa ve mukanda ya munu. Beno bika yawu tii kuna mu ke vutuka, na manima ya bilumbu yiya to tanu.”

252 “Mbote mingi,” bawu tubaka. Ba tulaka mwa note na zulu kuna, samu na kulandisa yawu ve.

Yandi kwendaka kutala mwana ya yandi ya kento.

253 Mpe na nzila, yandi—yandi telemaka na yinzo-Nzambi mosi. Mpe yandi longaka na nkokila yina. Na suka yina landaka, yandi tubaka ti yandi banzaka na mbala mosi, “Kwenda baka

mukanda yina bikanaka.” Mpe ntangu yandi salaka yawu, mukanda mosi ba pesaka kuna na poste mpe kumaka na mwana ya yandi ya kento; mwana ya yandi ya kento fidisaka yawu kuna, na poste yina bikanaka.

<sup>254</sup> Mpe yandi zibulaka yawu. Mpe yandi tubaka ti yawu vwandaka bakala mosi, Tata Hildebrandt, yina kele nkundi ya munu, yina vwandaka bakala yina vwandaka tula ba-bande. Yandi tubaka Tata Hildebrandt kele na ndinga yina me katuka na Roy Borders (mpe yina kele mosi ya bantwadisi, beno zaba), ti mu ke sala balukutakanu awa, kubanda kilumbu ya makumi zole na nana tii na kilumbu ya ntete ya ngonda ke kwisa, yandi vutukaka samu na ngomona na yandi mosi.

<sup>255</sup> Yandi tubaka, “Ntangu yayi, tala awa, bantu yina ke na kumeka na kubenda munu na kima ya mutindu yayi!” Beno me mona? Mpe yandi losaka kaka mukanda na kati ya kitunga, mpe yandi kwendaka, beno me mona, mutindu yina. Mu kwendaka mpe salaka lukutakanu yina na nkokila yina. Mpe na suka yina landaka . . .

<sup>256</sup> Na yina yandi tulaka diboko na ntima ya yandi, yandi bandaka na kudila, kaka kuna na kati ya bureau.

<sup>257</sup> Yandi tubaka, “Tata Branham, mu zabi ti mu ke telama na ntwala ya Nzambi.” Yandi tubaka, “Mu zaba ve kana mu vwandaka ya kulala to yina salamaka.” Yandi tubaka, “Mu lotaka. Mu ke tuba ti mu lotaka mpe mu lotaka.”

<sup>258</sup> Yandi tubaka, “Mu banzaka mwana ya munu ya bakala, kuna na zandu, yandi tulaka diboko ya yandi na kati ya saki mosi.” Mpe yandi tubaka, “Ntangu yandi salaka mutindu yina, ya vwandaka saki ya ba-pomme, mpe yawu nionso tiamukaka.” Yandi tubaka, “Ntangu mu belamaka samu na kulokota yawu, yawu vwandaka ba-pomme ya mubisu yina vwandaka kondwa kitini mosi na yawu.” Yandi tubaka, “Mu vwandaka lokota yawu, mu tulaka yawu na kati ya saki.” Yandi tubaka, “Bayankaka na kati ya yawu vwandaka dindumuka, mpe yawu dindumukaka, na yina mu kwendaka kubaka yawu, mpe na nsi ya . . . na matiti.” Mpe yandi tubaka, “Yawu dindumukaka na nsi ya lupangu yina vwandaka ya kukanga na muniololo. Mpe ya vwandaka na bala-bala ya nene yina vwandaka luta kuna. Mu talaka na este, mpe,” yandi tubaka, “muniololo vwandaka ya kukangama na ditadi ya nene kuna na este. Mpe mu vutukaka kuna na manima, mpe mu banzaka ti mu ke zabula muniololo yayi kuna, na yina mu ke kwenda kuna mpe mu ke lokota ba-pomme samu na bakala yayi.” Yandi tubaka, “Mu bandaka na kuzibula muniololo.”

<sup>259</sup> Yandi tubaka, “Ndinga mosi ningisaka ntoto ya muvimba.” Yandi tubaka, “Ntoto ninganaka, na nsi ya makulu ya munu.” Mpe yandi tubaka, “Na manima ya kubika kuningana, mu kuwaka ndinga mosi.” Mpe yandi tubaka, “Mpangi Branham, yawu vwandaka ndinga na nge,” yandi tubaka, “Mu zabaka

yawu; kima mosi tubaka mutindu yina.” Yandi tubaka—tubaka, “Yandi tubaka, ‘Mu ke tambula diaka na nzila yayi!’”

<sup>260</sup> Mpe yandi tubaka, “Mu bandaka na kutala na zulu ya ditadi, mutindu *yayi*, mpe mu talaka ntama kuna, na zulu ya matuti. Mpe kuna na zulu, na zulu ya ditadi yina vwandaka ya kutandama na esete na wesete, ya nsongi mutindu *yayi*, mutindu pyramide, mu vutukaka na este, mpe,” yandi tubaka, “nge vwandaka kuna, na zulu ya mpunda yina mu me monaka ntete ve na luzingu ya munu; mpunda ya nene ya mpembe, na mika ya nkingu ya yinda ya mpembe.” Mpe yandi tubaka, “Nge vwandaka me lwata mutindu mfumu ya Indien, na bima nionso yina ba Indien ke sadilaka.” Yandi tubaka, “Yandi vwandaka na kinkuti ya kisengo; na ba-bracelets na maboko, mpe bima yina vwandaka diembela bisika nionso mutindu yayi.” Yandi tubaka, “Nge vwandaka me telemisa maboko ya nge na zulu mutindu *yayi*.” Mpe yandi tubaka, “Mpunda yina vwandaka me telama kuna mutindu mpunda ya basoda, yandi vwandaka tambula na mbangu ya lulendo mutindu *yayi*,” mu vwandaka ningana ve. Mpe yandi tubaka, “Nge bendaka bansinga ya mpunda, nge kwendaka kuna na wesete.”

<sup>261</sup> Yandi tubaka, “Mu talaka kuna, mpe ya vwandaka na bantu mingi ya mayele.” Mpe na suka yina landaka. . . Yina vwandaka Kilumbu ya sambanu. Na suka yina landaka, mu longaka na bantu ya mayele, beno zaba, yina mu tubaka ti vwandaka ya diabulu. Mpe yandi tubaka, “Bantu ya mayele kuna vwandaka mwangisa bima na kati ya ba-tube, mpe vwandaka vukisa yawu.” Yandi tubaka, “Nge telemisaka mpunda, nge telemisaka diaka maboko ya nge mpe nge boka, ‘Mu ke tambula diaka na nzila yayi!’” Mpe tubaka, “Ntoto ya muvimba ninganaka. Bantu yayi ninganaka,” yandi tubaka, “yandi talaka na zulu mpe yandi talaka mosi na yankaka, mutindu *yayi*, mpe talaka nge. Bawu ningisaka kaka mapeka ya bawu, ba landilaka kaka na kusosa ya bawu ya science.” Mpe yandi tubaka, “Nge bandaka na kukwenda na weste.

<sup>262</sup> “Mpe ntangu ya salamaka mutindu yina,” yandi tubaka, “Mu monaka bakala yayi yina vwandaka kukibokila profete, beno zaba,” yandi tubaka, “yandi kwisaka na zulu ya mpunda yina vwandaka ya mpembe ya kuvukisa na ndombe.” Mpe yandi tubaka, “Yandi kwisaka na manima ya mpunda yayi ya nene.” Yandi tubaka, “Ya vwandaka,” yandi tubaka, “kuna na zulu ya matuti, mpe nzila vwandaka ve nene kulutila *yayi*.” Mpe yandi tubaka, “Mpunda yayi ninganaka kaka, mupepe vwandaka vimbisa mansala mpe nionso yina na—na kazaka ya nge,” mpe yandi tubaka, “na yina mika ya nkingu ya mpunda ya nge mpe mukila vwandaka ningana na mupepe. Mfumu ya nene, mpunda ya nene ya mpembe, yina vwandaka tambula ya kusungama.” Mpe yandi tubaka—mpe yandi tubaka, “Bakala yayi kwisaka na manima ya nge, yandi katukaka na Canada,” mpe bakala



yango ke zingaka na Canada. Mpe yandi tubaka, “Yandi kwisaka kuna, mpe,” yandi tubaka, “yandi vwandaka meka na kubwisa mpunda ya nge ya nene, na mwa mpunda ya yandi ya fioti; ya vwandaka balula yandi; samu na kubula croupe ya yandi na . . .” Yandi tubaka, “Ata mbala mosi ve ti mpunda ya nene ninganaka; yandi landilaka kaka na kutambula.”

<sup>263</sup> Yandi tubaka, “Na yina, na mbala mosi,” yandi tubaka, “nge balukaka.” Yandi tubaka, “Yina vwandaka mbala ya tatu yina nge zonzaka, kasi mbala ya zole nge tubaka ‘Mu ke tambula.’” Mpe yandi tubaka, “Nge tubaka ve mutindu nge salaka. Nge pesaka lutumu.” Yandi tubaka, “Nge balukaka mpe bokilaka bakala yina na nkumbu ya yandi, mpe tubaka, ‘Kulumuka kuna! Nge zaba ti muntu mosi ve lenda tambula na nzila yayi awa kukondwa Nzambi kutuma yandi na kusala yawu. Kulumuka kuna!’”

<sup>264</sup> Mpe yandi tubaka, “Bakala yango balukaka.” Mpe yandi tubaka, “Bakala yango sonikaka na munu mikanda.” Mpe yandi tubaka, “Na lweka ya luketo ya mpunda ya yandi,” ndombe yayi na mpembe, mpe yina ba me vukisa kintwadi, tubaka, “na zulu ya luketo ya mpunda ya yandi vwandaka ya kusonika nkumbu ya yandi, signature ya yandi kaka mutindu na mukanda ya yandi. Mpe yandi kwendaka kuna na nord.”

<sup>265</sup> Yandi tubaka, “Na yina nge landaka nzila ya nge; mpunda ya nene yina balukaka, ntama kuna na weste mutindu nge lendaka.” Yandi tubaka, “Nge telemaka mpe telemisa maboko ya nge mutindu *yayi*.” Na yina yandi bandaka na kudila. Yandi tubaka, “Mpangi Branham, kumona mpunda yina ya kutelama kuna; na mutindu ya mvita mpe nyonso mutindu yina, mpe,” tubaka, “kinkuti ya kisengo yina mpe nyonso yina vwandaka ngenga.” Yandi tubaka, “Nge telemisa kaka maboko ya nge na zulu mwa ntangu fioti.” Mpe yandi tubaka, “Nge talaka diaka na nsi, nge bakaka diaka bansinga ya mpunda, yandi tubaka, ‘Mu ke tambula diaka na nzila yayi!’” Yandi tubaka, “Ntoto ya muvimba ninganaka mpe nionso yina, mutindu *yayi*.” Mpe yandi tubaka, “Luzingu vwandaka diaka ve na kati ya munu; mu kubwaka kaka na lweka ya ditadi. Na yina mu vumbukaka na mpongi.”

Yandi tubaka, “Yinki ya zola kutuba, tata?”

Mu tubaka, “Mu zaba ve.”

<sup>266</sup> Na suka yina landaka . . . Junior Jackson, yina lotaka ndosi yina ya pyramide, beno zaba, ntangu mu kwendaka kuna na weste. Beno ke bambuka moyo na yawu? Yandi bokilaka munu, ngonda mosi to zole na ntswala ya yawu. Yandi kuzwaka ndosi ti yandi vwandaka pela; yandi zolaka tuba na munu. Mpe mu tubaka, “Billy. . .”

267 Ya vwandaka pene ya makumi zole kuna na ngaanda. Yandi tubaka, “Junior Jackson, kele kuna, yandi me tuba ti yandi zola tuba na nge ndosi yango.”

Mu tubaka, “Kotisa yandi, bamuniti tanu.”

268 Yandi kotaka na kento ya yandi, mpe, mutindu mhangi, yandi me tuba. Yandi tubaka, “Mu lotaka, Mpangi Branham, munu na kento ya munu kwendaka tambula na ditoma.” Mpe yandi tubaka, “Mu talaka kuna na este, mpe mu monaka, mutindu, kisika mosi, mutindu mosi ya ba-soucoupe volante yayi.”

269 Beno me mona, yinza zaba ve yinki ya kele, beno zaba. Beno zaba ti ya kele. Beto zaba yinki ya kele. Beno me mona? Beto zaba ti, ya kele Bawanzio yina ke talaka na ntwala ya lufundusu, beno me mona. Mpe wapi mutindu kuna na Pentagone mpe nionso, ba ke mona yawu ke kulumuka kuna; mpe mayele ya bawu, wapi mutindu bawu lenda kwenda mutindu nzasi mpe ke zimbana, ba ke tina konso kima yina bawu ke na yawu. [Mpangi Branham me fina misapi ya yandi—Mu.] Beno me mona, bawu zaba ve yina yawu kele, beno me mona. Bika ti bawu banza nyonso yina bawu zola. Bawu ke bokila yawu ba-soucoupe volante, to nyonso yina. Bawu zaba ve, beno me mona.

270 Yandi tubaka, “Mpe mu monaka yawu ke kwisa, mpe mu talaka yawu. Mpe yina yawu vwandaka, yawu vwandaka bakala mosi na zulu ya mpunda.” Mpe yandi tubaka, “Yandi kwisaka na mbangu ya nzasi.” Yandi tubaka, “Mu monaka ti yandi kwisaka na ntwala ya munu. Mpe mu telemisaka ditoma ya munu, mu basikaka na nswalu nionso. Ntangu ya salamaka mutindu yina,” yandi tubaka, “ditoma . . . mpunda vwandaka ya kutelama na bala-bala, mpunda ya basoda ya nene ya mpembe vwandaka tambula na mbangu ya lulendo.” Yina kele Ndinga, ya kieleka, beno zaba, kutambula na lulendo.

271 Yandi tubaka, “Ya vwandaka na bakala mosi ya kuvwanda kuna.” Yandi tubaka, “Yandi—yandi vwandaka ya kulwata kazaka ya far west; yandi vwandaka ve cowboy, kasi,” yandi tubaka, “yandi vwandaka monana mutindu mfumu ya gendarmerie na mpunda kuna na wesete to kima mosi.” Beno me mona, kimfumu ya yandi nionso, kuna na weste; ba-Indien na zulu ya ba-Indien; ba-gendarme na zulu ya mpunda, beno me mona. Mpe yandi tubaka, “Bakala yango vwandaka me kulumusa yimpu ya yandi na nsi, mpe yandi vwandaka . . . yandi vwandaka tala na lweka yankaka.” Mpe yandi tubaka, “Ntangu yandi balukaka na lweka yankaka,” yandi tubaka, “ya vwandaka nge, Mpangi Branham.” Yandi tubaka, “Nge tubaka ata fioti ve mutindu nge salaka ntete. Nge tubaka, ‘Junior!’” Mu bokilaka yandi bambala tatu. “Mpe yandi tubaka, ‘Mu ke tuba na nge yinki kusala.’” Mpe yandi tubaka, “Na yina nge simbaka diaka bansinga ya mpunda yayi. Nge kwendaka pene ya bitambi tatu,

mpe kwendaka na zulu, mpe nge vwandaka diaka ve kuna nge kwendaka na weste.”

<sup>272</sup> Yandi tubaka, “Vingila fioti, mu talaka na nziunga, mpe awa kwisaka mpunda mosi ya fioti mingi kulutila yina, ya dikanda ya mutindu mosi, kasi ya fioti mingi, mpe ya telemaka kuna.” Yandi tubaka, “Mu belamaka kuna, mu tubaka, ‘Yandi fwana fidisa yayi samu na munu.’” Yandi me tuba, “Mu me mata yawu.” (Junior me tambula fioti na mpunda, mpe. Yandi tubaka, “Nge zaba kana selle ya nge me lunga samu na nge, Mpangi Branham, ba-étrier mpe nionso yina?”) Yandi tubaka, “Mu banzaka, ‘Mbote, yayi me lunga kaka samu na munu.’ Na yina mu bendaka bansinga, mpe mu kwendaka na mazulu.” Yandi tubaka, “Mu bendaka na bansinga mpe mu telemisaka yandi, mu balulaka yandi mpe mu vutulaka yandi. Beno me mona? Ntangu mu vutukaka,” yandi tubaka, “Mu telemisaka mpunda, mu kwendaka, mu kulumukaka samu na kutuba na kento ya munu. Mpunda vwandaka me kwenda.” Mpe yandi . . . ? . . .

<sup>273</sup> Na yina, mazuzi, bilumbu tatu me luta, Leo Mercier kwisaka, kieleka na ndosi ya mutindu mosi, kukondwa kuzaba kima mosi ve samu na yawu; ya vwandaka samu na kuvukisa étalon ya nene ya mpembe na jument ya ndombe, ba lendaka ve kusala yawu; ya vwandaka na kidi-kidi. Yandi tubaka Mu kwendaka kuna, yandi tubaka, “Leo,” mpe mu tubaka na yandi yina mu vwandaka sala. Mu zola ve kutuba yawu awa, beno me mona, kasi mu tubaka na yandi yina mu salaka. “Mu tubaka, ‘Beno ke mona ve? Ntangu yayi, samu na kuzaba yayi; mu zabaka ve ti Ed Daulton vwandaka na bokilo ya bakala, mpe bokilo ya bakala yayi vwandaka na yimbwa na nkumbu yayi. Nge ke zaba, Leo, ti nge ke na kulota. Kasi, ntangu nge ke vumbuka na mpongi, nge bambuka moyo na yawu!’” Mpe yandi tubaka, “Mu me kuwaka ntete ve lutumu ya mutindu yina.”

<sup>274</sup> Pene ya ntangu yina, Roy Roberson kwisaka, yandi tubaka, “Mpangi Branham, nge ke bambuka moyo na manima kuna ntete nge katuka na dibuundu mbala ya ntete? Beto vwandaka . . . Mu monaka nge ya kuvwanda, mutindu na Palestine. Beto nionso vwandaka, conseil mpe bima nionso, vwandaka ya kuvwanda mutindu mesa ya madia ya nkokila ya Mfumu, na manima nge vwandaka tuba. Mpe nge . . . Yandi vwandaka zaba ve yina nge vwandaka zonzila.” Yandi tubaka, “Dituti ya mpembe kulumukaka mpe bakaka nge, ya nataka nge ntama.” Bantu yikwa ke bambuka ndosi ya Mpangi Roy? Mpe yandi tubaka, “Dituti ya mpembe me nata nge,” mpe yandi tubaka, “na manima ya nataka nge. Mu vwandaka tambula na babala-bala, mu vwandaka boka mpe mu vwandaka dila.”

<sup>275</sup> Ntangu mu vutukaka awa, mpe mwa diboko ya yandi ya kifu, mutindu yandi vwandaka, mu vwandaka tanga yayi. Yandi yambulaka rato mpe bandaka na kudila ntangu yandi monaka munu ke kwisa kuna. Mu monaka yandi ve na ntwala yandi

bandaka na kutuba na munu ndosi yango. Mpe yandi tubaka . . . Mpe yandi vwandaka benda matiti. Mu tubaka . . .

276 “Mpe—mpe nge kwendaka.” Yandi tubaka, “Mu tambulaka na babala-bala, bisika nyonso, mu vwandaka meka na kuzwa nge. Mu lendaka ve kumona nge, kisika mosi ve. Mu vwandaka boka, ‘Oh, Mpangi Branham, kukwenda ve!’” Yandi tubaka, “Dituti ya mpembe kwisaka mpe nataka nge, mpe nataka nge ntama ya beto, kuna na weste.” Yina vwandaka na ntwala ya pyramide to nionso yina. Yandi tubaka, “Ya nataka nge kuna na weste. Mpe mu bokaka, mpe mu vwandaka tambula na babala-bala.”

277 Yandi tubaka, “Na manima ya mwa ntangu fioti mu kwendaka mpe mu vwandaka na mesa. Mu talaka kuna na nsongi ya mesa.” Yandi tubaka, “Mu lendaka mona ve kulutila *yayi* na nge, ya vwandaka mpembe.” Yandi tubaka, “Nge vwandaka ya kutelema kuna.” Mpe yandi tubaka, “Nge zonzaka na lutumu. Ya vwandaka ve na dibanza ya yawu.” Yandi tubaka, “Muntu nyonso vwandaka bakula kieleka yina nge vwandaka tuba.”

278 Oh, mpangi ya munu ya bakala, mpangi ya kento, ntangu yayi, beno nionso ke na kubakula, mu zaba yinki ya zola tuba. Beno me mona?

279 Beno tala kaka! Beno vwanda pene-pene na Klisto. Beno bika mu kebisa beno ntangu yayi, mutindu mulongi ya Nsangu ya mbote, ya yayi. Beno ndima ve konso kima yina. Beno banza kima mosi ve. Beno vwanda kaka kuna tii kuna kati yayi ya kati ke vwanda ya kukangama na Ndinga, ti beno kele ya kusungama na kati ya Klisto, samu ti ya kele kima kaka yina ke . . . Samu, beto kele na nsungi ya luvunu mingi kulutila yina beto me zingaka ntete ve. “Ya ke vuna bantu Basolami kana ya lendaka salama,” samu ti bawu kele na kupakulama, bawu lenda sala nyonso mutindu bayankaka.

280 Beno sukula baluzingu ya beno. Beno futa bamfuka ya beno. “Beno vwanda na mfuka ya muntu mosi ve,” Yesu tubaka. Ntangu yayi, ntangu yayi, mu zola tuba ve, samu na kufuta yinzo ya beno mpe bima, beno fwana sala yawu. Beno katula bizitu nionso na maboko ya beno. Beno yidika bima nionso mbote-mbote. Beno kubama. Beno yilama. Beno bambuka moyo, na Nkumbu ya Mfumu, kima mosi ke zola kusalama.

281 Mu ke kwenda na miongo na sabala yayi, ya kele ve samu na kuzomba bampadi; ya kieleka, mu ke zolaka kuzomba bampadi. Kasi mu ke kwenda kuna samu na lukanu yayi, na kutubaka, “O Nzambi, mu zaba ve wapi nzila ya kukwenda, mpe mu zola kondwa yayi ve. Sadisa munu.”

282 Beno sambila samu na munu. Beno ke sala yawu? Mu ke sambila samu na beno. Mu banza ti, na mawa ya Nzambi, ti mu

ke kutana na beno nionso, mpe beto ke kutana na Yinsi ya kitoko mingi kulutila yayi awa.

<sup>283</sup> Mpe samu na yinki beto ke kwisaka awa? Yinki beto ke na kusala? Beto ke kwisa awa, samu na kusala nsaka? Beto me kwisa awa, beto ke na kukutana mutindu na loge? Ya kele, Klisto lenda kwisa ve tii kuna Dibuundu yayi ke vwanda kieleka ya kulunga. Yandi ke na kuvingila beto. Mu ke kwikila ti beto me kuma na nsuka.

<sup>284</sup> Beno tala yina salamaka, na Californie. Beno tala kudasuka ya bantu. Beno tala bantu kumi na yivwa ba me kufwa, kufwa bantu samu na mpusu ya nzutu ya bawu. Mu tubaka na beno ve, awa ntama mingi ve, ti Martin Luther King zolaka twadisa bantu ya yandi na lufwa? Bantu yikwa ke bambuka moyo na yawu? [Dibuundu me tuba, "Amen."—Mu.] Ya kele ve bantu yayi ya ndombe; ya kele bantwadisi ya bawu ke pusaka bawu na kudasuka. Ya kele ve kukota na kimvuka mosi, ya kele kukabwana, mpe nionso yina bawu zola bokila yawu; ya kele diabulu. Ya kieleka. Ve kaka samu na mundele, bantu-ndombe; ya kele bawu nyonso. Ya kele dyabulu.

<sup>285</sup> Bantu kele na ba-faculté mentale mpe mabanza ya kubeba. Ya ke na kivuvu ve. Ya kele ntama na kivuvu. Ya kele nionso ya kupola. Ba-faculté mentale ya bantu; bawu lenda ve kubaka balukanu.

<sup>286</sup> Mu kele muntu ya politiki ve. Mu kele ve, Démocrate to Républicain. Bawu nyonso kele ya kubeba. Mu kele samu na Kimfumu mosi, mpe yina kele Kimfumu ya Yesu Klisto. Kaka yina. Kasi beno me monaka ntete nkonga ya ba-mariionette na yinza mutindu beto kele na bawu kuna na luyalu na ntangu yayi, mutindu nkonga ya Texas yina beto me kuzwa kuna? "Kasi," bawu ke tuba, "mutindu bantu ke zola! Kana bawu zola communisme, beto ke pesa bawu communisme. Kana bawu zola kukota na kimvuka, beto ke pesa bawu kukota na kimvuka. Beto zola kukabwana, beto ke pesa nionso." Wapi . . . Wapi kisika bantu kele?

<sup>287</sup> O Nzambi! Yina kele mutindu mosi na chaire. Wapi kisika bantu kele, bantu yina, yina ke telama samu na kunwanina musiku? Wapi sika kele bakento yina ke telema samu na kunwanina musiku? Wapi yinzo-Nzambi yina me telema samu na kunwanina musiku? Mu kele ve na ba-centime zole ya ntangu ya kulutisa na mpeve ya lebe-lebe, ya koyi-koyi, yina ke kakulaka. Kento kele kento, bika yandi kuvwanda mama. Kana bakala kele bakala, bika yandi kuvwanda bakala.

<sup>288</sup> Kana yandi kele ntwadisi ya yinsi mosi . . . Wapi sika kele John Quincy Adamses ya beto? Wapi kisika kele Abraham Lincoln ya beto, bantu ya misiku? Wapi kisika kele Patrick Henry ya beto, yandi tubaka, "Pesa munu kimpwanza to pesa munu lufwa"?

<sup>289</sup> Wapi kisika kele muntu yina ke telama samu na yina kele mbote? Wapi kisika kele muntu yina kele ve na boma ya kuzonza? Ata ti, yinza ya muvimba ke telemina yandi, yandi ke zonza samu na yina kele mbote; mpe ke telama samu na yawu mpe ke kufwa samu na yawu. Wapi kisika kele Arnold von Winkelried ya beto diaka bubu yayi? Wapi kisika kele bantu ya kusungama? Wapi kisika kele babakala na mpeve ya mbote? Bawu kele ya lebelebe mingi mpe ya koyi-koyi mingi ti bawu zaba ve yina ba ke kwikilaka.

<sup>290</sup> Nzambi, bika mu telama samu na misiku ya Muntu mosi, mutindu longi, Ndinga ya Yesu Klisto. “Samu ti mazulu na ntoto ke luta, kasi Yawu ke kubwa ata fioti ve. Na zulu ya ditadi yayi Mu ke tunga Dibuundu ya Munu; mielo ya difelo ke nunga yawu ve.”

Beto telama.

Nsinga ya ngwisani kusakumuka yina ke  
vukisa  
Bantima ya beto na zola ya Baklisto;  
Kubundana ya basantu  
Kele mutindu yina ya Zulu.

Ntangu yayi beno vukisa maboko ya beno mosi na yankaka.

Ntangu beto ke kabwana,  
Ya ke pesa beto mpasi na ntima;  
Kasi beto ke vwanda kintwadi na kati ya  
ntima,  
Mpe na kivuvu ti beto ke monana diaka.  
Tii beto ke kutana! tii beto ke kutana!  
Tii beto ke kutana na makulu ya Yesu;  
Tii beto ke kutana! tii beto ke kutana!  
Nzambi vwanda na beno tii beto ke kutana  
dyaka!

<sup>291</sup> Beto kulumusa bayintu ya beto ntangu yayi, na yina Mpangi Neville ke bika beto, na kisambu.

<sup>292</sup> Beno vutuka na nkokila yayi, ntangu yayi. Beto ke na kuingila lukutakanu ya nene na nkokila yayi, awa na tabernacle. Nzambi sakumuna beno. Mpe beno sambila samu na munu; mu ke sambila samu na beno.

<sup>293</sup> Beno banza ve ti mu kele fanatiki, bankundi. Beno banza ve ti mu ke na kumeka na kupusa kima mosi na zulu ya beno. Mu zola beno. Mpe mu ke na musiku mosi, ya kele Biblia. Ba lenda katula Ndinga mosi ve na Yawu. Ba lenda ve kubwela na Yawu. Mpe mu ke kwikila Yawu mutindu ba sonikaka Yawu.

<sup>294</sup> Beto kulumusa bayintu ya beto ntangu yayi, mpe pasteur ya beto ya kukwikama, ya kieleka ke sukisa na dibuundu. Nzambi sakumuna nge, Mpangi Neville.



*MPE NGE ZABA YAWU VE* KNG65-0815  
(And Knoweth It Not)

Nsangu yayi ya Mpangi William Marrion Branham, kulongamaka na Kingelesi, na Lumingu na suka, na kilumbu ya 15 ya Ngonda ya nana, na mvula 1965, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2022 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)